

小方壺齋

小

方

壺

齋

舟行記

潛山張必剛著

陸有車馬水有舟皆能達南北路抵○京師而舟行較車馬稍逸吾自皖城登舟沿鳩江歷采石至金陵易舟抵廣陵再易舟渡淮水亂黃河陟直河衝泃口挽牯河宿濟甯再易舟越南旺跨臨清循衛水浮交河泊天津再易舟沂白口止通州水行凡三四千餘里經吳楚齊魯燕漕經湖牯衛白必五易舟乃至其自灣山抵皖城凡百里自通州抵○京師凡四十里皆乘車鞭馬提行李伴從以來水陸既皆可達○京師陸行之勞頓既不如水逸而陸行止二千七百餘里水行多五分之二遠近迥不同然而求事之速者未有不勞求身之逸者未有不迂以滯故莫得而兼焉然吾之來此除游憩與羈候僅一閱月耳亦不爲不速其沿途所經歷自皖城至金陵水皆東向流自廣陵至濟甯水皆南向流自南旺至天津皆北流自白口至通州又南流水東流北流皆順南流皆逆故自南方來○京師始順次逆次又順次又逆自○京師往南方反是一往來間水不能皆順不能皆逆對待而交易本事理之恆無足怪而人心則忽欣欣然喜忽戚戚以憂君子之自處也卓然有定宰於中無妄撼於外故閱兩岸之景可以陶性情覽城池都邑村落之勝可以商今古納朝暮煙雲之變可以窺元化坦坦施施檣帆任其卷舒順不爲遭時逆不爲失意斯曠蕩不役於物而茫洋以自娛夫水流無定態者以風與之迎送愈多參差矣何必役役容心爲或者謂水行厄乎風濤而陸行無是然亦有陰雨也車馬覆壓以折患更與舟同善處之水不必危不善處之陸不必不危吾惟不擇物而操其在己故不以彼易此



省闈日記

吳縣顧 祿著

道光壬午七月朔癸酉知涵香文廟執事辦果予始議先發適君繡過從語及同行君繡欲之遂訂初八日離郡

初七日己卯侍父祀江神令張福治裝隨役卽遣辭戚友見餽贖禮

初八日庚辰巳刻拜辭祖慈以次庭訓諄諄諸父昆季及至戚好相送登舟少選君繡剝行李上船乃發更次出潛壑臨宿望亭柝鳴野戍秋暑蒸人弦月欲墜始就枕席

初九日辛巳黎明解維至清甯汎水淺舟膠牽挽寸進迫暮僅出熙春橋泊九龍山日薄崦嵫山光漸暝遠眺蓉湖尖景色絕麗星斗繁天燈火耀岸使蕩以畫舫佐以清歌風景何減白堤

初十日壬午曉發小金山連朝密雲不雨稻田幾槁桔槔聲四野相聞鄉人閔旱歲歉可憂申刻入常郡惠濟橋雨陣虹見卽霽泊艤舟亭蘇文忠公讀書處也亭殊不葺然樓閣臨水頗臻幽勝

十一日癸未辰巳間舟膠毘陵驛以麻索努力絞行勞擾良久止行里許水縮載重舟子謀小舟般剝急不能待與君繡易小舟挈囊裝過行食頃出西門風帆順利勢若奔馬行二十六里過奔牛鎮宋明帝遣沈懷明擊孔覬曾至此築壘又十八里過呂城開闢水湍激有聲甚壯明月滿船涼風襲體過雲陽已夜分矣

十二日甲申小泊新豐鎮居民市肆頗盛沽酒甚香洌李白詩云南國新豐酒東山小妓歌卽此也羶肉甚嫩行二十七里過丹徒鎮居人多織蘆爲席岸高於山過老人聞風雷大作電影擊舟小幾傾幸爲風水所沖攔住沙岸急繫纜而定雨行二十里泊市口聞宋太祖置堰軍四處而呂城及京口在焉船舫櫓比多楚巫巴客酌酒鬪毆幾致失足夜觀金山塔燈風濤擊船輾轢有聲

十三日乙酉風潮益勁榜人不告便風解船君繡亟提予登陸見江中驚濤駭浪舟搖兀如一葉掀舞由北固山梁武帝改京口城樓曰北顧樓故又名北顧山多峭崖如削然皆土也宋史誤以爲石壁寺曰甘露有宋吳琚所書天下第一江山六字在榜委折行四五里達河神廟吾船已進港順風張帆懲昨日狼狽約舟人搖櫓進發不應舟中見金陵羣山蒼翠萬狀蜿蜒數十里俄頃雲氣接天連續不斷申泊龍潭驛君繡苦舟中掀簸商從旱道發登岸探詢驢賈較殺於棲霞厓定八騎約候曉即發返舟聞後行船多有折檣破帆者小舟叩舷買魚頗賤蚊如蠶輩船矮不復能設幃夜大風舟人增纜驛卒驚邏不寐達旦十四日丙戌策蹇登程亂嶺縱橫層折而過土人駕獨轆小車七八輛聲軋軋然先後進發行三十里飯朱家店赤日滿空過紫金山墮驢者再且喜草褥青軋身如因風荷葉寸膚不傷申西間過孝陵衛西望明陵基址茗蕘規制闊壯進東華門汗流浹體跋履殊苦蓋距朱家店又行四十里矣尋入滿城棗代步提銜以從君繡先至鈔庫街全寓雲芝出迎賓至如歸夜臥甚酣

十五日丁亥早起詣北府塘武廟拈香夜長板橋玩月迤東至水關一望青溪笛步間溪名九曲發源鍾山吳繫東渠爲之邊笛步卽在青溪橋之右今上水閘是也河船三五放乎中流中設道場僧歛財宣佛號與鼓鏡聲相應水面放蓮花燈遠眺如明星萬點錯落波中中元薦亡多於臨河施放焰口蓋金陵舊俗云

二十一日癸巳侶梅過訪買櫂偕往城北一路隄淨如埽雞犬閒暇鳧鴨浮沈土人多持竿釣魚舍舟至隨園園爲袁太史子才別墅依小倉山成院落迴廊高下複室層疊環宅皆流泉石壁青林文篠四面亦別無人居忽聞木屋香遂蹤迹至隱仙庵庵在清涼山西去百餘步地極幽邃司香淪茗饗客憑闌少息桂馨一山沁人心脾殿後高閣一椽有老梅大可數圍葉陰映蔽云是六朝間物欲訪四松園遍叩不得

徘徊歧路間忽二扉豁開秋色盈階相詫良久乃蹇步而入見沙山迎面色如紫金而光有洞可拾級而上旁亭曰四照其下旱船一築怪石林立古松三四樹鬚甲天矯如蛟龍闌前羅植鷹來紅斑爛奪目客至不叱不迎予方以誤入桃源未敢逗遛遵故道而歸述所見於君繡曰公等欲往四松園乎所游者卽是也相與鼓掌而笑夜與君繡談詩

二十四日丙申晴早起涼爽如深秋飯已謁蔣侯祠在鍾山下數百步松柏森列石榻尙存侯名子文漢未討賊戰亡吳大帝詔卽山下立祠以祭改曰蔣山

二十八日庚子跨衛出聚寶門游雨花臺臺在長千里南地多五色石晚望石城西北火雲如山奇怪萬狀明日之熱可畏矣

二十九日辛丑秋暑酷甚雖有微風了無涼意乃打漿至蓮花橋登岸行數里抵清涼山山下居民結綵爲棚沿街供地藏王像香火燈燭比戶皆然上山進香者率大戶婦女晚煙四起滿路皆朱萸繡幃各有蒼頭小婢簇擁下山而去返舟微雨暑猶未艾揮扇不止

八月初四日乙巳丹崖約遊正覺寺寺本名水月庵地極狹陋嘉慶某年住持獲教匪方容升有功柏制軍請闢沿城一帶民房給帑建造朱門三級遍釘獸鏤宛然宮殿厯院落數重悉峻宇雕牆刻角丹楹無纖毫塵埃○賜有正覺禪寺額

初六日與君繡等至東花園度竹籬錦鱗池伏秋草陸荒雖有蘆棚幾處揭青帘賞白酒而酒徒紛擾不足流連相與至三山街街甚廣闊夾道皆廊浮屋買賣者甚眾競買土宜將歸以貽人

初七日戊申蕩河船出水西門弔盧莫愁湖團團十里撲鼻猶聞荷香壁間題詠甚多後有勝棊樓奉中山王徐達像紅袍烏紗奕奕如生兩朝勝蹟千古留名誰謂英雄兒女有時盡哉少憩落日銜山清風吹

衣促舟子回權

上海著易堂印行

十三日甲寅同君繡買歸舟繫河下約先束裝上船候明晨放開行涼甚

十五日丙辰申刻與君繡飲於桃葉渡鱗雲巖巖九月不明兩人對酌頗失登望之興憶曩歲與徐香林買燈河舫雙槳平分皓月一天箏瑟盈耳今香林已作故人而景色亦懸殊矣說者謂秦淮繫自祖龍水由方山來西流沿石城達於江春夏之交潮汐盛至秋杪冬初水落不通舟楫故泛舟者自初夏迄仲秋爲多然今年閏餘秋水縮已徑尺矣則盛夏可知也又云竹醉日較往日尤盛傾城出游游船數百震蕩波心船皆覆篷廠上懸角燈下設回欄中施几榻盤盃尊罍之屬靡不精良船四面不設窗寮便於願盼有大走艙小走艙之稱歸寓遣郭玉至侶梅寓挈囊裝

十六日丁巳早出三山門雲芝之送至大功坊而別坊爲中山王故里登舟進發泊燕子磯下磯石甚巉峻本名鷹門山臨江瞰水形如飛燕故名居民市肆何止數百家其間復有巷陌往來憧憧如織瞥見及肩土垣胥衣薜荔紅榴萬棵燿垣外柴門面江剝啄久之老僧出迎願翼樂自言年九十二歲不出關者蓋七十餘年矣顴頰如丹鬚鬢無白者起視中堂供三世佛金容掩色一廢蘭若也庭廣可數畝悉種榴樹卽牆外所見者僧外一鄉農灌溉茶罷辭出入宏濟寺捫蘿側足歷三重懸崖峭壁撲面飛來崖下連互數楹旁廊一殿扃鍵甚固僧戒不可窺探左轉至鐵索鍊孤舟危閣一楹以巨練數匝環繞峭壁壁上皆丹藤翠蘿羅絡如寶裝屏風徙倚良久而下復循石徑覓沿江十八洞入迹罕經僅通樵牧跣躡行二里許始達第一洞乃長臺洞也洞口有椒紅泥牆屋就洞穴爲之中供古佛一僧侍香火屋後石壁黯黑不可辨相將覓第二洞嵐氣騰空山雨欲來急趨返舟黃天蕩雖無風亦浪湧是夜雨細風靜一波不驚比曉已入御河口



十七日戊午平明出萬緣山莊萬枝髡柳煙雨迷離舟中遙望板屋土牆幽邃可愛舟人挽繹行急誤竄入罾網中遂致勃谿登岸相勸幾爲鄉人所窘償以百錢始悻悻散行百餘里灘險日暮不敢發約去港口數里泊江湖大來荻蘆如雪肅肅與風相搏推窗看月是夕正望宛如紫金盤自水湧出水勢益長湖漚有聲與君繡侶梅縱談聞金山蒲牢聲知漏下矣覆衾而眠

十八日己未夙興風淒冷如暮秋初御裘解舟渡七里江江中有二島左曰鸚山舊傳有棲鸚右曰雲根島皆特起不附俗謂之郭璞墓旭日初升望金山頂塔金光四射樓觀如畫瞬息入京口申刻抵雲陽觀音山對面有觀音寺寺前又有練光亭下關練湖湖又名開家湖相傳開氏七世同堂歿爲水神保障一方黃昏過大王廟前有淮陰侯坊夜行五十四里遇糧艘下南舟阻毘陵

十九日庚申飯已尙阻不行旋見糧艘魚貫而泊乃得徑過行四十三里過洛社傳以爲樂道德出身處行三十里泊錫山漢末讖記云有錫天下兵無錫天下甯自光武以後不復產焉蓋自南望亭以北夾河皆長岡高壘多陸種黍麥或灌木叢篠氣象窘隘至是稍平曠而山水亦秀絕囑舟子竟夜進發歸心如箭不得軒睡

二十日辛酉早抵筓山予以船濟跳岸買小舟先行命張福挈行李伺啟關而進還家拜見祖慈暨嚴親曰吾計女此時當歸也



南行日記

山陽黃鈞宰著

道光甲辰七月初八日赴試金陵同行者劉丈鏡青喬二劍秋及予兄弟六人

解纜後三日泊舟高郵之露筋祠祠奉女象據米元章碑文當是唐宋間人蓋清潔自守被蚊齧露筋而死者陶公雲汀以御史巡漕禱冰於此翌日冰泮北風大作空運船全數出江始得奏請錫封○賜名貞應自是靈異益著祠中聯額極多記其一聯云冷月照寒塘十里殘荷香未歇夕陽沈古渡一湖秋水影長清陳曼生句云清淮君子水山木女郎祠有集漁洋詩者云湖邊孤寺半煙篠門外野風開白蓮不卽不離而貞潔自見

行抵瓜洲劍秋指點金焦兵燹之餘名山無恙幸矣明日泝江而上萬山如馬遠接金陵別有凌空一峰矗立雲表望山頂如有叢茅鏡青曰夥哉此棲霞寺前銀杏二株也大可十數圍相傳爲六朝時物蓋竟日西南行茸茸者常在目也

燕子磯如鳥張翼向東北迎人飛來磯石如喙凸出江外其下陡壁轉縮入若孤懸天半者然同人登○  
○御詩亭行吟眺望予獨走磯上足逡巡二分垂在外誦坡翁大江東去詞及曹孟德烏鵲南飛之句忽有一人躡足大呼曰墮矣時江上漁舟百數皆仰望驚叫同人爲之失色予回視其人則通州張仲綬也相與大笑而行鏡青丈曰戲不可若是其甚也幸而不墮不可謂能不幸而墮不足爲勇劍秋云太史公有泰山鴻毛之喻設竟墮而不起亦可謂萬古雲霄一羽毛耳同人復大笑

報恩寺與雨花臺相近寺中浮屠十三級四壁金身佛像低眉努目觸境皆是其外則金碧宏麗雕鏤空靈相傳爲東南第一塔梯登六七級望金陵城中形勢歷落萬山合沓虎踞龍蟠曠哉觀乎再上二三層白日如丸天風浩蕩浮雲飛鳥轉出其下視下界人物如鴻濛未闢時也由寺而南爲方正學祠堂上一

聯云管仲不爲著這件麻衣十族章身都有具成王安在看那枝鐵筆萬人指點到於今佛寺令人靜此令人敬敬與靜之分儒釋之等次智愚賢不肖固有之良也

遊金陵者必誇秦淮風亭月榭簫管凌雲輒謂此間樂不思歸也不知天下樂境大率局外者味之彌深一入其中索然意倦久而不返且將有不樂者至矣蕩小舟設醕酒一二知己容與于丁簾水閣之間人影迷離皆國色也歌聲縹緲無往而非法曲仙音也不此之樂而必欲身入穀中陋矣

宗感澤招遊鍾山策騎同往由孝陵至靈谷寺虬松怪柏分列成行寺有石屏高二丈許寬如其十之八光滑如鏡卽爲佛座屏風又鐵翦一具兩股橫徑七八尺長則倍之委之苔蘚之間同人力舉不少動老僧曰是從南海飛來不計其年矣感澤不信僧曰疾風震雷之時飛砂走石地可動山可移於一翦乎何有山半有泉距寺里許寺僧截竹爲筒高下曲折首尾相銜達於廚下飲之清冽而甘憩息既久薄暮馳歸入海叢中燈火漸上

觀音門外諸佛寺沿江負山深秀奇峭幾於目不暇給宏濟爲諸寺之一中有僧趺坐石洞中不食不言不知其年歲鼻息若有若無據言終歲如是非僞爲惑人者歸舟過此游覽既徧復登磯上紀之以詩

舊鄉行紀

休甯邵嗣宗著

癸亥春正月八日由太倉起程晚至崑山

九月十日舟次吳閶

十一日自吳江至烏鎮

十二日至杭州東新關

十三日過江塘是夜舟泊錢塘

十四日曉發經三淞江紆迴曲折溯流而上夜抵富陽

十五日渡桐江經富春山一路山勢重疊高岡綿互迴抱合沓迤邐而入柳子云舟行若窮忽又無際此殆似之自是以上率以爲常是日晚霽夕陽如赭江月皎然

十六日過釣臺經乳香巖至嚴州嚴故睦州宋以前先世居之今則支派在嚴者譜系無可考矣夜大風

雨舟次宗潭

十七日渡馬沒灘波清若鏡可鑑毛髮至倉後灘溪水奔溢如駛舟不得上自是灘水之迅日甚一日每涉一灘泉聲若吼過則淥水澄澈波紋如縠

十八日早發將至棊園有山萃起絕壁峻嶒午刻雨甚篷窗縮瑟山色迷濛但一片煙景耳過漢河民居傍山依水斜交密布崖石嶄然築亭其上綠樹映帶左右夜泊遂安港口

十九日復雨過淳安經霽山潭四圍高山潭中有響四山皆應

二十日雨甚舟不得進阻錫行渡

二十一日渡雲頭潭至八郎廟灘勢險急較前益甚四山積雪寒氣逼人

二十二日雨雪渡米灘牽鑽灘橫石灘三灘爲徽河最險處過此則水勢略緩矣夜泊綿潭雪益甚

二十三日天霽渡莊溪而上夜泊岑山山峙中流林木蒼鬱樓閣隱現望若仙居

二十四日發程山渡夕春未下抵屯溪

二十五日雨易小舟至梅林水漲舟不得進

二十六日雨至休甯縣

二十七日雨謁家祠

二十八日雨

二十九日晴齋候親族之在城者

二月一日謁鄱村下普林祖塋

二日至六日積雨泥濘

七日往龍源吾宗自司訓思宜公於明洪武四年遷龍源迄今四百年矣夾溪而居支派蕃衍今亦稍衰

八日往霞村

九日往西館環珠

十日往甌山至座主金慕齋翰撰第并至石嶺

十二日往水南歷古城巖

二十一日至二十六日飭祭事

二十七日大雷雨卯刻迎先府君神位入祠祠前樹木表一立經魁額午刻祭祭畢合族會食

二十八日族人設公席

三月一日辭別親黨歸吳

四日早發下汝溪天色清明波光蕩漾午刻抵屯溪

五日發屯溪春水灌河舟行若鷺峰迴路轉倏忽變態晚至街口

六日至淳安泊百步街

七日過嚴州晚至鸕鷀源口

八日過桐廬日亭午風甚舟不進次新店灣

九日已刻至高陽風復甚舟不進

十日抵錢塘江易小舟進杭州城再易舟夜發

十一日曉至新市經含山是日清明節遊人雜沓有水嬉者夜泊大船坊

十二日午刻至吳閫

十三日辰刻抵家





雪鴻再錄

青浦王 昶著

乾隆五十三年二月初二日以驗收騰越城工赴迪西初七日至龍尾關得富制府綱書始知調任江西蓋仰荷○聖慈以雲南路遠量移近省故也惟江西地丁二百餘萬年衰多病之人仍予錢糧重任爲慚悚爾二十九日還至鎮南州吏部文始到遣人進摺謝○恩并請○陛見因是時已屆錢糧奏銷之期遂上奏俟新任布政使季承鄴到日交代起程六月初一日季君抵昆明初五日交印遂以十二日起行百姓供花置酒炷香以送者自省城至鷓鴣哨幾二十里不絕輿譚撫軍尙忠別於官廳與司道別於興福寺又小飲而散是日至板橋各府州縣及佐雜送者百餘人辭之乃宿

十三日申刻抵楊林前此連旬陰雨及時晴霽輿人快之嵩明州陸紹宗及江西餘干縣高鳳肅運銅在滇俱來見

十四日從瀟湘江行三十里抵海潮寺微雨禮佛登樓松竹環秀水雲沓靄其間忽露濃翠絕境也方丈中懸鄂剛烈公容安書唐人海暗雲無葉山寒雪有花句筆力雄勁可想見其致命遂志之概蓋公少時隨文端公總督來此故時時有遺墨然鄂張兩家不相能而此書頗似得天風力何歟下有雲連樹色微分岸船載波光直到門聯句句爲昆明孝廉陸藝作王夢樓文治昔以侍講出守臨安見是聯吟賞之由是郵傳人口藝字漱亭其弟藻字江萍兄弟皆能詩而漱亭尤工畫余之將行也江萍撰五言五韻詩余以烏目山人畫冊贈之漱亭復作畫扇贈行題句云頻年繪事幸操觚墨寶詒來勝珮珠試仿耕煙清妙筆滿山風雨送行圖兩君昆明之偶也申刻抵易隆爲尋甸境晚晴宿

十五日知州王序端來見云尋甸催科不易四面皆山幅幘袤五六百里山寨中居民絕無貿易日取苦蕎和穀屑之索其家無藏數十錢者婦稚複襦不完寒則焚枯於側而已貧人鬻田而留戶名田主以賦

與之屬其代納貧入因為乾沒計故受追比者實無出之人而田主無名追呼又不能及是以民欠頗多追之急強者抗差而不服弱者雖到官鶉衣百結扑責亦無益其拮据如此迤東百姓窮於迤西證以所聞不誣也早飯行三十里過關索嶺小憩下板橋又五十里抵馬龍州知州朱士鼇山西介休人宿於州署之澄齋有池有樹有橋有亭乘月眺望風景頗勝

十六日曉雨旋止行四十三里滿山皆蕎麥花花紅者苦花白者甘故甘蕎為多至三岔驛飯又過茶亭塘三十里抵霑益州境署知州盧陶來見先是緬酋孟允嗣立以兄孟駁曾抗○○王師又屢與暹羅構疊移其阿瓦城於宋寨而令頭目業貌瑞棟等具金葉表文并氈布檀香及馴象十由木邦耿馬土司乞納款制府以聞且責其送還從前被遮之楊重英而屬余往大理以受其降至是書來云頭目已見詞意極誠懇楊重英亦以六月初一日自阿瓦送出云

重英羈緬境久且病送至孟養而死

十七日晴由霑益分嶺而下土山戴石高率數尺許如圭璧如弁冕如神剌鬼鑿湖嵌不足數也行可十里至白水驛又為南甯所屬館舍後胡桃數株參天合抱下有石磴石澗小山離立極佳蓋似昔人廢墅

十八日陰過棠梨灣始微晴至楊威哨入平彝縣境知縣熊孔榮來迎經青溪洞巖厓如哆層吻下廣數十席供佛其中有僧居之石皆皴瘦透余前此曾游其半今聞洞中水多沮洳暑中饒蛇蝸未暇繼前游也小坐茶話至縣署宿

十九日微晴五十里至滇南勝境則出雲南境矣過玉真觀汎見新選雲龍州知州王鳳文為鴻臚寺卿劉君壘中表四十里抵亦資孔遇思茅同知徐孝標吳縣人以引見回滇談○京師事甚悉是夕微寒不知正入中伏也

二十日飯畢行十里過蛾郎塘村後有溪沿溪迴欄短竹屋瓦鱗鱗後有長廊繞之景幽勝或謂此鄧檢討蘭溪再馨所居吸光飲淥宜其早踐清華也小憩馬桑塘又三十七里至劉官屯宿

二十一日晨雨過庚戌橋卽西林渡也雨止四十五里過楊松塘楸槐蒙密沿路離立雜以椶櫚濃陰如幄其下茅茨數十家婦稚皆有自得色自入黔境秧田上下彌望青葱與往年迥別又二十里飯於上寨晚霽風極涼昇輿者皆踴躍又四十七里宿於白沙是日行兩日程亦資孔劉官屯上寨皆普安州境白沙普安境

二十二日微晴得家信云六月初連日大雨官道水深四五尺繞榛莽巖礪中行騎駝多損壞者家眷幸以十二日至鎮達下水矣過半坡塘俗謂之老鷹岬自岬而下屈曲數十盤幾四十里因此知滇境之高申刻宿於阿都田安南縣境也

二十三日十里渡毛口河蓋西林渡水自此達於重安江最湍急使縣官作木筏數十此十餘站中不惟便行人亦利於載貨物江中亂石數處開除亦易惜懶於事者計不及此自毛口行山勢漸陡卽拉幫坡矣盤曲亦四十里及頂始地邇下由打鐵關十里至郎岱是處有同知駐之夜大雨

二十四日晨冒雨行山岡起伏陂陀上下雜以泥淖頗爲滑刺至坡貢飯西風起稍晴由繁花塘三十里過白水河登望水亭亭正值飛瀑積雨後噴薄而下望之如十輛車如百練帛如疾雷迅霆大地震動蓋前兩次過時當冬春水涸故未獲見此奇觀也又行三十里夜抵鎮甯州城署州事胡融來見蓋湖州庚寅孝廉亡友胡石田彥穎編修再從姪也

二十五日行六十五里至安順府提督保君成帥其五營將校來迎知緬甸進貢奉○○旨允行不必更俟楊重英且令其頭目於木蘭圍畢後進見與蒙古藩王同○○賜筵宴今貢使貢物已於二十一日在

大理啟行矣適威甯鎮總兵許君世亨至此君以去秋奉○○旨領黔兵赴臺灣合勦林爽文等臺寇平陸授浙江提督仍令送兵回黔再赴新任蓋軍營舊識也因言林爽文莊大田等賊眾雖多皆烏合福公康安海公蘭察鄂將軍輝及提鎮等率川楚黔粵兵先從北路直前奮擊一戰而潰林爽文遁至生番社圍擒之其南路莊大田等聞信亦駭散一併俘獲兩人各起事實非同黨云

二十六日早行天極晴山風時作未覺為大暑也自郎岱東來山峰多拔地離立如米廩然石紋層疊土人斷而分之用蓋屋可以代瓦故謂之石板房汎云晚至安平

二十七日晴西風作涼仍可御綿夾衣也路平坦稻田中均有山泉貫注灑灑鳴不已過界首龍井蘆荻諸塘六十五里抵清鎮

二十八日由清鎮行經高樹鴨江諸塘凡五十里未刻抵貴州省治李撫軍·吳學使壽易及司道府縣皆來迎遂徧拜之至暮暫安州知州王元顯開州知州馮克鞏候補知縣杜成皆來謁元顯同年丹忱

日杏之子丹忱從温相國軍沒於木果木以難廢得官克鞏魯巖光熊之子由美諾通判陞此杜父杜錡原任商州知州余舊屬也癸未門生藩憲武罷官在貴陽授經亦來見時驟熱與清鎮迥殊相去不百里而氣候相懸如此

二十九日吳學使及司道招同許君及福建鹽道孫君思庭集於城東門外觀音寺戌刻始散吳君以所刻時文見示貫串經術不愧作者

七月初一日李撫軍招飲以趨程辭遂行四十八里至龍里縣宿是日雲陰且多風夜雨極涼

初二日晨雨行五里齋抵新安塘露日色頗熱過牟珠洞不入小立洞門前涼風刺骨於此知仙山洞壑中自有清涼世界也經乾谿塘早稻已吐穗花亦香甚至貴定

初三日是日晨起大雨如雹沿途山水下注皆成飛瀑匯於溪澗驟湧丈餘與巨石相激聲若車轟其有徑途而過者奔雷濺雪盤互輿人足趾間駭絕亦奇絕也過黃絲雨止抵鄭陽蓋平越州境晚晴夜復雨初四日晨起霧過黃花塘上下甚峻峭又過魚梁江今名響琴峽流泉奔瀉如練僧人將於此建觀世音自在閣至石關蠟梅塘晴頗熱抵清平縣知縣張端來迎湖南醴陵人館舍甚幽翫蓋以備緬甸貢使故沿途皆修葺也

初五日晴經大風洞道第不可行兼以亂流宿莽兩兼從扶掖往視之雨後水從洞噴薄出挾石而走不能入也土人云冬間如列燧穿入五里許可出後洞至楊老驛又八里抵重安江兩次皆以夜行今觀其形勢亦頗雄偉過江飯畢微雨頃之抵黃平晚晴宿

初六日晴十餘里過飛雲巖余三遊此矣石愈翫愈奇莫窮其妙正如後人秀士非一見得盡其奇也惟下劣惡詩疥石過多當如劉夢得過巫山削去乃快耳尋王文成公碑摩挲久之乃行過沼沙塘登頓而上甚峭又過草塘關至施秉縣是日辰刻已立秋矣舉頭新月但有感歎

初七日晴三十五里至劉家莊飯踰相見坡抵鎮遠府總兵李君杰龍帥隊伍來迎知府蔡君宗建湖北監利人庚辰孝廉前任四川眉州知州因辦軍需識之而其子世忱又雲南會澤縣知縣也是夕招飲觀劇於府署同席者爲門人仁懷廳同知陳林及鎮遠縣知縣吳玉堦晚熱甚揮汗不止蓋因尙在中伏耳亥刻大雷雨連日得飛雲巖石一漚溪石一皆鍾乳所成極鬼鑿神斤之巧歸途可壓輕裝矣

初八日曉晴換船由水路行余前此來滇泝流而上至玉屏登陸今於此放舟得盡玉屏清谿水道之勝矣雨後水漲瞬息數里而夏山濃綠奇秀兼之直補疇曩所未及也未刻大雷雨水益駛行八十里至瓊洞泊

初九日晨過酒店塘蓋入湖南境矣此下諸灘皆曩時所游歷者爾時水落舟泛石罅行頗慮其戛觸茲則水漲溪平怪石鱗鱗然在水底舟行小有顛簸爾午晴望思州府城隱現竹樹之外晚抵晃州泊秋暑雖劇而夜無飛蚊差自適也

初十日微陰午驟晴極熱過冷水塘是沅州芷江縣境也太守張任齋官五署知縣黃九銖皆來迎任齋蕭山人向在四川是南明親家黃江山舉人以麻陽令署事在此抵城辰沅道王梅岑家賓亦於郵亭相候梅岑往為內閣侍讀故識之是時湖南聞緬貢將至燈棚戲館陳設甚盛夜宿府解書堂花木頗雅整十一日梅岑招予於使院小飲觀劇至午始別薄暮雷雨泊於玉樹灣中夜月色皎然

十二日晴連日北風雖水順不能速也山雲忽起時雨時晴而石壁往往臨水如屏峭立其間洞穴空嵌千百異狀覺疇曩所記未足盡其奇

十三日入激浦縣境聞五月間出蛟水忽涌二丈屋舍摧塌淹斃者萬餘浦撫軍霖率道府來勦已議卹云至辰溪縣泊山半野火不斷蓋以時近中元人家多作盂蘭盆耳二更風作繼以微雨始涼

十四日晴過白龍辛女諸灘又過辰州府泊荆江水驟漲至四丈八尺潰城入將軍道府衙署俱沒於水而公安亦為水所漂文報不通者至十餘日傷斃者數萬人布政使陳君淮因勸水至此僅以身免舒制軍常已自武昌馳往驗災矣蓋川江之水為下流漢江洞庭彭蠡所橫截不能宣洩故上流漲溢如此十五日過橫石九溪諸灘未刻過清浪灘水漲灘平前所見奇絕處皆在水中風景轉不如冬春也酉刻圓月東升便有秋意

十六日辰刻過桃源溪山平遠村墟蕭然幾於清暉娛人游子忘歸矣未刻抵常德提督俞君金鼈來迎而湖南巡撫臬使糧道皆使人迎候并見署縣事許順安徽休甯人也

十七日俞君招飲觀劇云荆襄水漲澧州一路茫無畔岸且時多北風決不可行緬使已從龍陽長沙由武昌出河南信陽宜踵之而行從之

十八日辰刻岳常澧道臧君榮青來見蓋以護送緬使來此謹飭自好士也遂行江漸闊無風秋暑甚戌刻至龍陽館舍精潔乘月游後園樓榭池亭足供吟眺

十九日由龍陽從江行田廬俱沒故江南寬至十餘里時北風浪湧舟不能行小泊久之日下春風定乃解纜四更始抵十里鋪宿熱甚

二十日陸行三十里至白鹿鋪五十里至益陽縣飲署縣事張宗文山西平定州人庚辰孝廉余平定門人二二爲董懋極一爲王遵典皆其同學也由四川擢永州府同知署此出城度長橋至毓德鋪宿

二十一日曉行五十里至甯鄉甯鄉無城郭渡江又五十里宿於柏葉鋪一名白箬鋪

二十二日四更行渡江司道皆來迎藩使郭世勳漢軍人年七十矣臬使恩長舊爲軍機房同事衡永柳桂道世常滿州人知府陳嘉謨仁和人辛巳進士已刻撫軍浦君延入署小飲觀劇西刻司道復招余及伴貢使賀君長庚觀劇賀君雲南迤南道也因事降調將引見故令其伴貢焉

二十三日小飲於恩臬使署大雨驟至頗涼

二十四日訪鴻臚寺少卿羅君徽五典蓋廿年前京都舊好且同己卯癸未鄉會試今主岳麓書院年七十乞身已十三年矣因邀往游岳麓渡湘江先過洲中江神祠登拱北閣眞江流天地外山色有無中也至書院規制頗宏偉云是前巡撫李恭毅公湖所修恭毅與余善撫楚日年餽余以湘蓮數篋清節爲時所稱不知其又能崇文教也李北海碑亭在牆外重臺响屨山碑在牆外之東皆可望見岳麓寺在山半秋暑甚輿人憚於行故未及往壁間見長沙諸生秦光俸詠花絕句頗工詢之乃楚材之雋異者少卿亦

示所著讀易讀詩管見自出新意頗多創解尚未刻竟也殺雞置酒劇談乃別比至橋頭驛已初更矣

二十五日五更行已刻渡湘江至湘陰縣暑甚飯已復渡又行六十里更餘抵歸義驛宿

二十六日晨自歸義渡江六十里至大荆驛此三湖湘陰所屬飯畢大雷雨以風頗解炎喝申刻乃行二十里過新橋肆集盛繁市北為新橋湖蓋龍宮樂活諸山水下注至此由女兒凹出湖列炬渡水亥正始

抵青岡驛是巴陵縣境三更後甚涼

二十七日行三十里時秋水未退道窪者尚淹乃泛小舟由水行蓋洞庭湖汊口也行十里又從陸路十五里午刻到岳州府城不入館舍直登岳陽樓樓三層面西而背東湖有東西之名因夏秋甚漲如楚雲墨山鳥紗諸洲盡沒湖與江連故江自西而東俗名東湖色黃西湖清泚自如也湖上君山以湘君得名形如龍龜爬沙數里道人云上有軒轅臺娥皇女英祠及柳毅龍神諸祠相距四十里不及往也君山稍西有樓不修者十餘年矣兩層皆供純陽子而仙像黯淡窗櫺零落扁山萬石山皆在煙波杳靄中而無耕住其間惜哉上層至無几案可坐下層屏勒張得天尚書書范文正公記云已重刻失真而往哲詩文

滕元諒所勒石皆無片石存者問黃令以偃虹隄茫不知所對道人在旁猶能指其址在東湖俗吏至此可一歎也坐至酉刻始入城館舍頗工麗

二十八日以夫馬未齊稍待之午刻臧君榮青及沅州府張君皆以送緬使回至此遂招飲酒半出白鳥見示霜毛雪羽為岳州近日所產蓋瑞徵也又觀劇迄戌刻罷散出東門沿楓橋湖而行是洞庭之別大路既逕取九華山麓小路行風高月黑惟聞湖流激盪頗憂顛墜過太平株木諸橋子刻抵雲溪驛宿是為臨湘縣境

二十九日辰起臧君遣急足贈龍井茶并舊拓張書岳陽樓記字畫道勁工秀可貴也是日陰時有雷聲



過白沙都南村鋪飯於長安驛過橋爲泉塘鋪又過梧桐鋪晚至巷口驛宿是湖北蒲圻境也驛後萬年寺以門前萬年橋名寺爲梁沖泉敦書方伯所修中懸梁文定公國治詩蓋撫湖時所作堂中歡心處三字相傳董思白先生任湖南學道書今非其舊殊覺惡劣耳徐調夫立綱嘗以主楚南鄉試經此有贈僧句云湘江秋色歸詩卷楚岫閒雲上衲衣其生平最佳句也三更後極涼

八月初一日午刻至蒲圻縣令王君學靜來迎乾隆庚寅進士出畢秋帆撫軍門下夕次官塘驛雷雨

初二日晨起大雨冒雨行江流灌注田廬低者皆成汙港衝泥跌掉刻刻歎顛仆也數次呼渡至咸甯知縣張廷春貴州舉人言在此三年矣大僚經過者以十數計所費至萬餘云日卓午飯畢由田畔行道路崎嶇詰曲如前每逢險處輒下步行三更抵山坡驛杳無候入自買新米炊食而宿云是江夏界也

初三日晴行十餘里坐小舟蕩槳過金絲橋遠岫平湖風景澹沱可謂勝地六十里抵東湖驛舍頗整館人供饌唯謹

初四日換船下東湖時沿江兩岸村莊漂沒渺漫無際午刻抵武昌學使吳中允省爾及德安府知府德興令孫誦曾來迎德前爲陝西興安府同知舊屬也時○○上以荊州隄垸平時不能完繕臨事又未搶護革府縣職荊州道嚴加議處并令巡撫姜君晟還京仍爲刑部侍郎總督舒公常仍爲工部尙書候至隄垸修整再回京而發帑二百萬令大學士英勇阿公同工部侍郎德君成來督工已由襄陽赴荊州矣河南巡撫畢公授湖廣總督以吏部侍郎惠君齡爲湖北巡撫未至時亦令畢公兼署於是姜君聞畢公先赴荊州齋印送交而自於初二日啓行入都武昌水亦入城城中窪者深三四尺衢路往往斷絕架以板始能行漢口巨鐘悉沒於水而布政使陳君淮尙在荊州按察使李君天培以迎接帑金赴樊城署鹽道漢陽知府楊君芳春又以護送緬使赴雲夢應山是年當鄉試主司已到而貢院尙爲水淹省中惟學

使及知縣經理試事監臨試提調皆之人聞沿江災地亦未勘奏蓋湖北吏治最為叢脞十餘年間大吏二三人贖貨賄窮侈靡百務弛而不張州縣無不虧帑者可歎也學使留小飲抵暮歸館於江漢書院蓋門人楊進士西和倫在此為院長日入史誦芬善長余遜翁慶長俱來復小飲而別

初五日以漢口淹沒無雇馬驟處遣人往社口雇之社口距城四十里實黃陂境也遂偕西和誦芬登黃鶴樓樓三層其外市廛星列下醫物者及游人甚夥差勝岳陽樓之荒索矣飯於樓中學使亦至款語久之乃歸仍宿書院秋暑甚烈

初六日署漢陽知縣朱梓來安徽舉人頗能詩前在四川余曾和其詠帳房之作

初七日仍住未能成行也

初八日社口信來云五六日間貢使及姜撫軍暨舒制軍家眷絡繹啓行雇驛馬以數百計故至是始得

驛綱

初九日行武昌江面本八九里今寬至五十里望漢口更浩淼也西刻抵社口館宿

初十日飯於雙廟宿於楊居驛是為孝感縣境日晴沙輾行一百十里輿人以爲快至夜雷雨

十一日早雨止頃之北風大作涼甚交白露節三日矣至此始有秋意也五十里至柳店市集頗盛又四

十里至小河店宿人煙叢密室宇整潔猶孝感境也

十二日晨起東北風益厲墨雲黯黯繼以密雨清寒入骨不減深秋造物真不可料也四十里至應山縣

屬勝河店飯又言雨行三十里宿廣水距縣四十里而距德安府城有一百二十里是夕雨

十三日○萬壽聖節也五更起望○闕行禮及曉行自雙廟來道中多平岡高壘至是四山迴合巒翠

霏青山下多稻田村墟相望饒有富庶之象過古甘露寺寺廢久矣寺旁人家牆墉周整其內樹木陰森

竹林尤盛且鱖魚陂焉又過大寨嶺卽雞公山亦謂之雞翅上有武勝關古謂之直轅又謂武陽春秋定四年吳伐楚左司馬戊謂子常曰子沿漢而與之上下我悉方城外以毀其舟還塞大隧直轅冥阨卽此俗又名恨這個關過此信陽州境矣又十里至李家寨宿稍晴夜有月

十四日曉晴竹樹峰巒新翠如沐可愛也沿澗水而行水源隨州黃土山水經注云出雞翅山亂流北注九渡水入之東北注于淮九渡實一水有橋界其上而注所稱東山一水發自山椒素湍直注可數百丈下注九渡入于澗水蓋卽今龍潭瀑布出於長老山者也又過東西兩雙河水六十里抵州城知州任大頊來迎江蘇蕭縣人同年任增任果之弟明何大復是此邦人詢其後尙多讀書者又考信與申同信陽爲周申伯故封至宋始有信陽之名申本四岳後姜姓虞夏間子孫受封有呂許申諸國申之疆域當在冥阨之北淮水之南周宣王時申伯侯封以元舅入爲卿士王嘉之命召伯作邑于謝是時謝滅久矣水經載謝水出謝城北今在南陽宛邑間意宣王欲慶以地而大之爲牧伯之伯非侯伯之伯故詩先云四國于蕃四方于宣而一則曰南國是式再則曰南土是保殆得兼有宛龜數百里之地也又考宣王姜后幽王申后子之妻父不得稱元舅意厲王亦娶于申或宣王前後亦有娶申之事歟其後申侯以幽王廢申后黜宜臼與繪人召犬戎弑王驪山下楚人因而討申伐呂侵許平王是以有戊申之役周人爲賦楊之水申培之說或未必無據也及後楚文王曾伐申事在莊公六年至成公七年子重請取于申呂以爲賞田而申公巫臣止之及靈王取房申以遷於荆而申始亡以水北曰陽之義考之今州城實在澗滿兩水之北其爲申伯故封無疑而州西北五十里有謝城故址申爲南北形勢所係故詳考而志之十五日行四十五里渡淮時秋水已落且距桐柏初發源處二百里故僅深二三尺行人可徒涉也渡水爲長臺鋪小住飯畢復行四十里至明河河源確山之天目山俗稱明港有驛猶信陽境也是夜月色佳

甚獨酌久之

十六日行三十五里飯於桂家店又行十里途遇湖北巡撫惠君齡藉草而語頃之乃別又五十里抵確山縣本名朗山避宋諱改確山在城東南六里與蟠龍山接即水經注浮石嶺也知縣金朱欄來見吳縣人乙未進士選於此三年矣言中州以前數年之河工四十九五十年之荒歉今雖豐而穀賤傷農民氣猶未復也極誦布政使景君安之賢與按察使陳君奉茲均以儉素相高實不易得云館舍在城西三里店宿縣有樊噲范滂墓顏真卿祠考確山本漢汝南郡初為安昌又改安陽又改陽安東漢改宜祿故朗陵侯國又名征羌滂為其縣人既與史合且滂墓在朗陵則為確山人無可疑者史稱季希烈殺魯公于蔡州安知不盡節於此康熙年間令蕭璋遠罷其祀者非也

十七日四十五里至駐馬店飯猶確山境也又五十里抵遂平縣寓王氏宅屋宇精整饒花木同年吳白華省欽褚筠心廷璋及陳春澈嗣龍以典試往來駐此皆有唱和之作惟春澈諸詩絕似晚唐名家是日

秋熱

十八日行六十里至西平又六十里至郟城即楚之召陵見知縣龍驤湖南湘鄉人恂幅無華之士也宿十九日行六十里至臨潁飯於書院規模宏敞惜今為往來館舍移諸生肄業於學宮可慨也飯畢行途中有周穎考叔祠漢諫議大夫劉陶墓又六十里至許州牧令皆來迎知縣為廉珠直隸甯河人庚寅孝廉頗誠樸知州李熾江西吉水人先任福建以卓異擢至此蓋能吏也

二十日行三十里至地飯猶許州境也過郵亭廟自是入新鄭又七十里抵城館於東門外城隍即洧水也水經注洧水出河南密以圖考之實出于太室山之馬嶺向謂出陽城長葛者弗深考耳

二十一日行四十里過段村又過停驂鋪而稍西飯於郭店蓋今時之鎮後周世宗廢陵恭帝順陵及呂

文靖夷簡墓皆在焉又有保安寺清深軒云黃文節公寓於此分植蕙蘭今廢矣又五十里抵鄭州

二十二日行四十里至岡林飯又十里抵黃河岸微雨候渡船久之東南風忽作遂挂帆行抵北岸又五十里戍刻始抵亢村驛薄暮甚涼疏星數點微露雲際

二十三日陰行六十里抵新鄉又六十里抵汲縣自此而北皆曩日所經也署開封縣吳有容來係松江婁縣人已卯孝廉前在京城曾見之言中州自河工荒歉後元氣至今未復今年夏旱秋潦民生亦尙窘迫也

二十四日行六十里至。飯自此見太行山橫列雲外其近山則蘇門百泉也三次過此未獲一游得毋山靈齒冷邪又過淇水甚駛橋下噴薄如雪日下春殊熱塵岔盈路

二十五日曉陰途中過子貢及扁鵲墓有碑然若堂若斧者不可考矣四十里至寶蓮寺有屋數十楹田四頃僧人十餘人耕而自食其力雖樸拙喬野亦可喜也又二十里抵安陽門人陰海來迎遂飯於館舍劇談久之是邑爲十省孔道輪蹄查至肆應殊不堪矣行三十里過華村長林蒼鬱室廬迤邐蓋聚落中之最盛者又十里抵豐樂鎮宿

二十六日行三里渡漳水水已落輿梁未建也是梁磁州與安陽遞年分任之今年當直安陽云七十里抵滏陽驛飯又四十五里抵邯鄲宿卽叢臺驛也

二十七日行二十里過呂仙祠唐人小說盧生炊黃粱處也祠久廢前年秋帆先生過此捐資爲倡於是鍾離呂仙及盧生臥像三殿皆修整前有橋有亭亦并新之其東八仙閣尙傾敝耳三十里至臨洛關距永年縣五十里有驛飯畢行又三十里過沙河寬十五里無水蹇澀難行遂逕沙河縣又三十五里抵邢臺蓋順德府治是爲龍岡驛因宿

二十八日六十里至內邱縣飯於中邱驛又六十里至柏鄉宿知縣李蘭來謁廣西桂林人乙酉孝廉來此甫四閱月耳係同年融縣知縣趙君傳紀之門弟子與魏教授廷皋善魏工墨梅有超然出塵之格

二十九日六十里至趙州塵岔滿目土人云自六月不雨至今三月餘矣四十里抵欒城知縣夏維翻來

謁四川資州人蓋土司之子字驚濤美秀能文曩在○京師曾爲刻三家絕句吳白華京兆之門人也

九月初一日陰行六十里抵恆山驛是正定府治也余乙卯門人米繹如教諭於此十年矣余五年前赴

西安時曾見之今年五十有五而貌益豐蓋安貧有養之士談久之乃別途次微雨惜不成分寸晚晴過

淖沱河五里抵伏城驛猶是正定縣所屬

初二日五十里渡河至新樂縣知縣歐陽泰健來見湖南衡陽人故詢兩湖被水狀并言當孔道者四年

冠蓋相望日不暇給而讞事之使及本省上司督辦公事往來取索頗不貲云三十里至定州小憩又三

十里至清風店宿

初三日行四十里至望都飯過方順橋遇雲南臬使玉君懿德○○陸見南回始知八月中旬園中雨多

水發未經校獵并述○○召見時問答良悉別而行飯於陘陽驛雨作泥融滑甚然潤沾秋麥農民之喜

可知也上燈乃抵保定

初四日晨雨過清河道朱君闕時方署臬司留小飲久之雨止乃行午至安肅飯畢又行抵定興宿

初五日過涿州至寶店宿

初六日至良鄉知縣章佩瑜出迎蓋五十一年曾見者飯已行至彰義門陸璞堂伯焜蔣檢亭雲師俱在

宿

初七日入城至璞堂寓見白華及張鄂樓形飯飯畢出城宿於林溝後車不至假寐竟夕此後所經皆往

日隨○○輦時所屢經者山川風土具見與安雜錄中

初八日飯石槽過懷柔經九松山途次尚有積水與人取小路行顛仆之至晚宿密雲黑雲漫天頗有欲雪意

初九日飯石匣宿巴克什營道中過大南門古北口楊業孟姜女廟潮河橋青石梁宛然昔夢正似匿王見恆河水時也爲之三歎逆旅正對文筆峰晚風起頗寒初見月

初十日途遇賀道台云緬使筵宴已畢伴送進京是夕宿喀喇河屯

十一日早大雪過廣仁嶺泥淖深尺許來牛過馬兼以車輛擁擠至不得行申刻抵熱河晤吳侍御槐江

熊光

十二日晨雨詣○宮門請○安頌之○召見首問經過湖廣水勢若何蓋○聖主厯念民生如此遂自陳衰老疲憊所謂外強中乾者○上以筋力未衰慰諭久之出晚晴見文華殿大學士和公坤東

閣大學士王公杰及戶部尙書福公長安

十三日○聖駕自熱河啟程旋京黎明侍班於○宮門外遂隨行頌之至喀喇河屯宿農家辣場殊不堪也

十四日侍班如昨隨○蹕至兩間房是日雲南貴州兩省勾決人犯內閣中書舍人秦君瀛爲文恭公

從孫適隨○蹕與論詩甚有所解

十五日隨○蹕至巴克什營勾決廣東西各省人犯是日順天鄉試考官大宗伯德公保等撤闈復○

命知廣庭先生次孫那彥成中式二十八名此兩夕皆宿帳房

十六日至遙亭子復○召見復以江西錢糧二百餘萬亦係財賦重地今遇事輒忘恐精神偶有疏失

不惟獲咎抑且負○○恩○○上慰諭如前且人才難得姑往新任又問以他事十數條而出

十七日晨在卡倫門外蒸送○○聖駕拊攜還京是晚宿石槽遇璞堂及陳春漱侍讀趙謙士舍人乘沖小飲

十八日進京宿宛平縣署

十九日見那孝廉彥成因晤吳毅人編修錫麒蓋其師也

二十日赴海淀見嘉勇福公康安及大司農董公器遂由西直門宿普濟堂

二十一日往見稽黼廷大學士寶東臬宗丞及孫季述編修星符馮侍御應榴皆劇談而別馮方集蘇詩王施查三註考其異同得失又附以宋元明詩話小說搜羅繁富將卒業矣

二十二日季述以秋帆先生所撰中州金石考見示是日復得黃小松書寄到新獲濟甯武班碑及孔子見老子像武梁祠堂畫像武氏前石室畫像又雙鉤范式碑空囊中忽得金甌殊可喜也遂行宿長新店

二十三日飯良鄉宿涿州

二十四日飯新城并白溝河行風帆漁艇頗有南中風景宿雄縣

二十五日晨起西北風大作塵埃鬱勃過趙北口四十五年正月隨○○輦觀燈○○賜宴聯句處猶可指數也頃之大雪極寒抵任邱縣飯言雪行又三十里雪止晚晴至河間縣知縣草靜山協夢由安肅調此以詩文來質與談禮經及性命之學初更乃別

二十六日晴寒風尚栗烈也六十里至獻縣又四十里至富莊驛宿是爲交河縣境

二十七日四十里至阜城驛又五十里至景州

二十八日二十里過劉智廟又三十里至德州見浙江漕船方以回空過此糧道葛君正華以迂總漕去



見署州王君毅安徽黟縣人蓋壽張令署事於此極言各省僉丁之難四十里過苦水鋪又三十里抵恩縣宿知縣羅士華來謁江西廬陵人前任四川鹽大使三十六七年曾辦卡丫達烏糧務具述衝途應酬之重百姓控告之繁今長撫軍著令凡差使百姓出馬一匹者守候日日給銀錢五分應差日日給三錢百姓得無上控而地方官已所費不資云是日臬使馮君魯巖及門人齊河縣李士勳遣使來迎并得王初桐信時爲河縣丞蓋詞人也

二十九日五更啟行七十里至高唐州魚邱驛大風寒甚又七十里至在平縣在山驛知縣顧振來謁蓋浙江藩使顧小韓姪也余四十五年奉○○命赴青州鞫事曾見余云是日繆方伯其吉覺羅撫軍長齡蔡太守廷衡均遣使迎候

三十日亦以五更行六十里至桐城驛又三十里至東阿縣  
十月初一日七十里至東平州東原驛六十里至汶上縣新橋驛已入兗州境矣門人高太守官璽遣使來迎宿

初二日五十里至新嘉驛又四十里至兗州府總兵柯君藩暨滋陽縣均以他事出小憩新嘉驛換馬遂行三十里至昌平驛宿

初三日三十里至鄒縣令慶泰以中書科中書保舉選此迎送甚恭辰刻見日旁有兩珥文成五色瑞兆也又五十里抵界河驛飯又四十里至滕縣署令濟南府同知鄭奇樹安徽歙縣人庚寅孝廉蓋同年鄭西橋詹侍御之姪來見

初四日六十里至臨城驛飯猶滕縣境也余四十八年由臨城赴臺莊以至清江浦今由岔道赴韓莊開因可以直抵徐州也過沙溝坨泥二市鎮新月皎然抵韓莊宿此爲汶沂諸水所經地潤故灰沙少而麥

已青

初五日行三里將渡運河河濱遇廷尉趙君佑及吏部主事祥君慶典試江南歸至此言九江一路漫溢爲災十月中將放賑矣而湖北黃梅縣淹浸至二十四村莊聞尙未奏報也仁語久之乃別飯於柳泉則入江南境矣暮抵徐州黃河其寬溜甚急津吏云今年水落最遲霜降河流忽長數尺爲從前所未有亂而渡山村城堞夕陽麗之風景佳絕時知府永君齡蒙古人通判楊君德芳漢軍人銅山縣知縣福慶滿洲人皆出迎而水則往在內閣相識者住利國驛淮海道帥君彥公陝西韓城人駐此亦來謁家叔華元勳爲府教授記四十四年余由河南入都因見於此今幾十年矣來見卽留飯話至深更乃別叔華出新搦李愿題名石幢見贈且道曹習庵仁虎病歿之由歎惋久之

初六日行五十里至桃山驛舊稱利國驛至東岸驛九十里又至桃山驛五十里者誤也候館無人自買魚菜食之亦復欣然一飽自是入安徽境四面亂山逶迤平遠村樹黃而未落輒有流水環之風沙亦漸少矣聞米價甚賤因秋收豐稔也至夾溝驛宿是爲宿州境

初七日二十里過褚莊鋪呼船過渡遙望人家樹木多在水中央土人云今秋七月河水漲道路村莊悉淹沒至今猶未盡涸以泥已澄故成清流耳十餘里將至符離驛復渡又二十里至宿州東門館舍飯又五十里花莊宿徐宿間時患水災荒涼殊甚百姓率編高梁爲壁泥塗之上苦以草劣能安膝卽打頭視其家無僮石儲可憫也

初八日二十里過任橋蓋·水所經也又三十里飯於靈壁固鎮驛又三十里過·湖有隄五四里許中有橋以通水又二十里抵鳳陽縣王莊宿是爲鳳陽縣境

初九日二十里至三鋪渡·水長橋互之又三十里遙望長淮蜿蜒從西南來驚濤往往拍岸淮水之爲

瀆不虛也過淮關造舟爲梁市園叢密濠梁驛舍後俯帶淮河一望淼瀾江西撫州通判李熈山東聊城人以卓異引見回在此來謁午中暄暖異常飯畢行三十里抵總鋪宿亦鳳陽境也

初十日二十里至臨淮紅心驛飯又四十五里池河驛極晴暖適福建布政使覺羅君伍拉納以擢任河南巡撫經此蓋先爲九江府知府余舊屬也相見絮語久之又行岡嶺數重坡陀高下二千五里至滁州大柳驛宿村莊相望氣象與靈璧鳳陽稍別

十一日行二十里至清流關江北無阨寒處差足稱雄然視予所經滇蜀黔楚諸隘如培塿耳宜周師竟入遂擒暉鳳也關內外村墟相望溪澗縱橫黃葉未凋風景殊勝又四十里抵滁州知州善慶出迎滿洲鑲黃旗人方略館繙繹官以主事選此飯於試院畢又行六十里所過諸市鎮頗繁盛抵東谷驛宿天暖雲微陰江月昏昏殆將風也自德州而山東皆以旅店爲館舍故馬糞牛糞倍極穢惡至是始新潔雅靚宿者乃安枕矣

十二日行三十里抵江淮驛小憩於馬氏宅壁間有金雨叔姓劉圃二星煒介座主福三侍郎觀補亭保總憲朱竹君學士筠石君侍郎珪兩弟兄門人馬葦舟緯雲孝廉諸詩時惟石君與葦舟在餘皆謝世矣周覽之下感歎久之飯已登望江樓江流如帶絕無浩淼之狀登舟風極靜長年搖舳逾時乃達南岸微雨入儀鳳門十餘里中樊圃相望翠筠黃葉飄蕭如畫使人作淒悴意六朝風物洵異乎他處矣入見書制府麟留晚飯出寓秦淮徐家水榭房櫳新葺不能復認舊蹤也兩涯燈火黯然繼以澹雲微月能無江山寥落之歎邪嘉興王尙珏來見蓋惺庵進士之子示翁覃溪方綱所撰誌銘并以近詩送閱蓋能紹其家學者

十三日制府復招飲已刻罷酒出時制府方主試武闈將入內場遂辭并徧拜諸司道聞袁簡齋故由蘇

州將游徐州雲龍山巖東有之子已往湖北謁秋帆制府而程魚門之子尚幼僑居白門無知之者教授錢學園辛楣宮詹之姪本舊好來訪出所刻史記釋疑澗亭述古錄及前後漢書歷志補註律呂古誼見示爲樂器究其實積辨其分杪推之以合於度量衡且自爰辰六日七分三統四分暨古來推步九章算術靡不淹貫蓋沈潛確苦之士也

十四日晴自水榭起程還出儀鳳門東南風不數刻而渡復至浦口馬氏家飯晚宿東谷月甚明

十五日至滁州善牧請游豐樂醉翁二亭因東北風厲而善牧病初愈不及往復自清流關而北十餘里皆柳樹淡黃慘綠蕭瑟隨風零亂溪渚未免軫羈旅之歎晚至大柳鋪宿

十六日晨過苦竹澗循大橋湖至池河驛飯是河自巢縣北流至此故名又過池河二里許路折而南六十五里經朗公山至定遠宿定遠古曲陽地隋屬鍾離宋屬濠州至明始屬鳳陽出名將最多如明初之李善長沐英楊國興等皆所產也尉遲敬德亦曾居於縣東鄉其後陪葬昭陵今志謂墓在石羊岡誤矣十七日四十五里至張橋驛飯又過江家港八斗嶺六十里至護城驛宿則合肥縣境矣極晴暖

十八日四十五里至店埠市集甚繁又四十里至合肥縣蓋廬州府治也城運十里雉堞整齊東門外帆檣林立運租船爲多知府張華甫江西武甯人辛卯進士以刑部郎出守署通判沈恕浙江平湖人雲椒少司馬族弟皆來迎由金斗驛換馬卽行十餘里過南昌鎮總兵永安以○○陸見入都至此位語而別四十五里至派河驛宿

十九日四十五里過陶冲驛飯猶合肥境也又三十里抵舒城又二十里至梅心驛宿則爲桐城所屬矣二十日行五十五里過呂亭驛飯門人李法時以東流知縣署懷甯首縣事遣使來迎又行十五里過縣同年貴西道戴君涵尊人名士濤率其孫來迎蓋戴君下世已五年矣遂往拜之并候姚姬傳兼姬傳爲

南青先生範猶子閒雅簡貴能詩古文以禮部郎中乞假前曾爲省城散敷山長會丁憂辭歸午後風作飛沙挾石肩輿軒簸過梁數道殊有戒心一更始達陶冲驛安徽陳藩使步瀛玉臬使德皆遣使貽書迎候

二十一日三十五里過小路口飯風復作又三十五里過潛山縣又四十里至小池驛宿

二十二日四十里過太湖縣又二十里過楓香驛驛屬宿松知縣爲蔣業謙蓋亡友蔣升枚業鼎之第七弟丁酉舉人由四庫館議敘石埭知縣今署事於此遣人來迎驛距縣三十里未得見也又六十里晚至黃梅縣亭前驛宿爲湖北黃州境自潛山西南諸山之水注爲·湖湖寬水緩淤沙日積水亦日漫湖底距岸僅三尺許距城根不及五尺土人云山水暴漲時東門封閉城外民居被水溺斃甚眾是以今無居人而田畝爲沙所壓不能種藝然催科如故未嘗請豁也隄即畚沙築之其下又取湖中圓石以爲隄基計水至則沙與石俱隨溜走隄安得不潰太湖宿松皆然白沙彌望此長吏之憂而縣官率委之里胥鄉老初不親往相度民又不知其無用奉行故事苟且補苴卒以淪胥及溺良可慨矣故詳著之

二十三日丑刻乘月行過黃梅縣聞五祖道場去大路纔二十里許未得往道緣終淺世緣深殊可感也黃梅爲湖北黃州府屬署知縣胡紹中來謁蓋廣東順德人已而廣東主考庶子茅君耕亭元銘司業納玉亭麟寶適宿此亦來見乃行田被水而未涸者尙十之四五昨趙啓人言黃梅尙未放賑詢胡令果然而鄉民百餘人來控云此地已徵秋米知縣不收米每石收錢五千湖廣安徽秋冬穀價頗賤知縣欲以此操奇贏辛苦昏墊之餘其能受此橫征邪湖北吏治近數年壞甚蓋長吏率責賂於其下獲賂則置一切於不問故各屬肆行無忌驅疲病之民而復虐之世有長沙當爲太息流涕也飯於左港鋪風大作又三十里過孔龍驛不入九江府通判鄒錫形德化知縣俞光豫及前知縣張泳渡江來迎風亦平遂渡及

岸知府達君阿桑及饒九道海君紹俱至入城海君留飲更餘回驛舍家奴有自秦中歸者以西安甘肅督撫司道府縣諸書齋閱知半庵在醴泉尙得所也

二十四日日出行過東林寺寺頽廢久矣僧四五人初不知爲念佛道場所修像設極可笑而遠法師作優婆夷像白蓮池化爲稻田此固僧徒惡劣亦守令之不能事與不好事耳三十里過通遠驛有驛丞駐此旁爲圓通寺頗修整而僧徒亦皆啞羊方口卽楞嚴華嚴亦訝爲耳所不聞彼法無人實甚於吾儒矣因飯畢行由馬回嶺烏石門共六十里至德安縣宿

二十五日過新興驛飯至建昌縣宿

二十六日曉行五十里過慈姑又三十里晚宿南浦驛遙望高閣迴出人家雲樹之表蓋別此已八年矣

二十八日入城莅事

江行日記

吳江郭 麀著

戊辰九月九日湖樓早起曉寒殊甚稍有開霽意從者報江船已具儼明晨束裝少頃小湖積堂放舟來話別攜酌舟中泊六一泉仲恬後至觴行譚流諧笑甚歡遂至曠暮不及登高而別夜有月但躑躅耳十日破曉同壽生啟窗東方精色昱然謂必無雨飯罷至鹽橋坐船赴閘口登江山船已下春矣城中舟行極遄回故也積陰已久勢不能驟晴時掠面小雨霏霏如霧回望鳳凰南屏諸山煙靄明滅十日相對別去亦不能無情邪六和塔近船無一里泥濘不克登是夜宿江頭寄丹叔書

十一日六和塔曉發至梅家堰小泊舟子欲換翁篷卒不果換但小補罅漏數處其貧薄可想幸天漸開朗亭午後日光盪窗當可卜數日晴也風順挂帆約行三十里許人定至富陽郭外一路烏柏經霜如赭如臙脂點綴淺絳山色間絕妙荆關筆也壽生有曉發詩下半云過江便合稱名士獨宿無因賦惱公自笑移居卽遠客全家破屋我疏篷此舟爲郡伯所送無半鈔俠侍而壽生於前月十一日移家魏塘至此剛而月余和之云別緒閒情君莫悵航船且要百分空文字之飲殊勝一餉醉紅裙耳

十二日曉霧迷漫不見雉堞舟子上岸糴米回日出三竿矣霧散氣霽羣山朗朗如列眉或左或右時見村落白稷黃梁布野垂穗有耒耨也村氓荷擔牧兒叱犢皆有熙然自得之色歲暮棲棲殊媿此輩賦六言絕句四首烏柏夾路丹碧爛然作買陂塘一闌薄暮去桐廬三十里而住夜分月色皎潔而天晏溫又恐未必久晴也

十三日起稍遲舟已行三十里矣天陰而不雨飯罷進七里瀧風利船駛帆如張弓兩岸羣山若馳驟奔赴絡繹送迎偕壽生坐船頭嘯詠甚樂記去年過此千搖萬兀百丈環環窮日方得出瀧然頗以遲故得盡所歷之妙此行雖快意又苦不少透遲以此微致不滿人心豈有如意時邪壽生素慕七里瀧之勝至

是始愜吟眺之懷作長歌以紀余亦填憶舊游一闕出瀧已下春風益橫船益駛舟人貪於進取值湍流  
猛悍竹石擊戛幾至傾側然並行數舟皆在其後日落風不止泊於大洋去嚴州三十里

十四日陰晦日中至蘭溪所歷數灘幸風色順利不至阨杲他舟有巍峨大艚而搖兀不止邪許之聲若  
牛羊駝圖可笑也到蘭溪之日舟子例買魚肉祭神具酒肴款客鬻鬟鬻女絲肉互發余所坐舟皆黃頭  
郎但乞利市博一醉飽而已僕人上岸買橋佐酒甘香沁鼻詠手香齒冷之句不覺愾然又起一念薄晚  
小雨開船不及十里泊於江心

十五日晴開帆行二十里始起推篷道中見小舟載山柴薑芋往來不絕舟人餉芋魁甚甘美日過中至  
龍游小泊斷岸楓林人家雜煙樹中皆有寒意復挂帆約行四十里泊於安宜是日始開篋取敝裘所歷  
灘以二三十數無十里安行者遇水碓處无端悍廉利號呼之聲徧東船西舫惟鳥鷺小艇得任意洄沿  
人生境遇所遭大略類是成灘行聯句三十二韻龍游卽古龍邱昌黎徐偃王廟碑所謂太末之墟姑蔑  
之城者是也惜未及登岸一訪其存否衢州民皆樹橋沿村纍纍丹黃可愛吾鄉洞庭東西霜酣萬樹風  
景尤更勝此與壽生言及各爲惘然

十六日晴曉臥見篷窗旭影晃朗卽披衣起吾友黃退庵有句云新霽天如快友逢今知其工也岸旁橋  
林益夥小者結實瓊碎大樹或止數十顆當已先采擷耳橋樹之外多圍以烏柏松榲石楠丹黃之色互  
相映發采橋者置高足橈列箒籠什什伍伍命儻呼侶殊似吾鄉采桑時風景同壽生各作衢州橋枝詞  
以紀之晌午過衢州灘急風小舟行稍遲曛黃泊北圩舟子有陳姓者家於此間門外垂柳毵毵披煙搖  
月屋宇亦修整黃雞白犬散布村落稚子小女應門問訊客中殊羨之到家以山中新摘連披之橘盈筐  
見餉杜老櫻桃昌黎木蕨甚感淳厚之意惜無二公佳句傳之耳命酒極醉月斜方就寢問去常山四十



里明午當可到也

十七日晴逆風行遲薄晚始至常山寄家書及廣瑞峰太守喬秋浦大令書初發江口買越酒一經程至是留一日之酌餘以昇舟人皆獲霑醉可云小惠而徧也

十八日晴僮僕皆破曉束裝至啓行已日出炊五斗黍頃矣風色甚寒始披風帽余及壽生皆重裘輿輻踰嶺飯於玉屏關米色殷紅然尚可下咽殆任彥升所謂桃花米邪初與丁慮路遠日短行頗駛至是乃稍透遲抵玉山未上燈也夾路皆賣漿家以女當壚布裳椎髻或傅粉黛與行客相媚嫉幸輿丁欲速行不爲流連鳩槃茶作摩登伽呪尙有爲攝入媻席者可一笑也止宿客邸候行李久不至和衣假寐二更後襍被始來遂得甘寢尋常上莞下簟輕衾重褥視爲固然或時輾轉不安行役困頓不得則大戚有之乃大歡喜若逾望者可以驗隨遇而安之難亦足以知知足之良易也夜中灘聲如雷燈火熒然始覺有天涯羈旅意

十九日晴立冬風從西來於行爲逆喜不大午飯後下三版船船開卽有灘過時視上水若天淵猶以風不順爲嫌殆又近於不知足也至十里山并山樹數百株皆禿鬻植立問之榜人云松爲蠶食葉垂盡以故幾不復識前此未有不知是何祥也復行約二里止泊

二十日晴風水俱順而一里輒有數灘帆時挂時落亦未能快意將及上饒一山斗入江楓檉雜圍彷彿似京口望焦山特未見其二面耳詢之舟子語譌不可辨殆所謂南屏天馬者邪惜無圖經爲之考證昌黎從人借圖經詩每逢佳處便開看諒哉斯言灘上小舟數十皆放鷓鷯者竹垞言自玉山至安仁捕魚多用烏鬼魚皆無味然亦未及買之也晚抵廣信府郭有府倅王某在前幕府舊識遣訊借府志以不具對上饒令梁某遣人饋食物辭之夜泊郭外

二十一日晴舟人破曉挂帆夢寐中聽風水激盪聲始悟浩浩復湯湯灘聲抑更揚二句體物之工蓋惟夜泊曉行從枕邊聽之乃知爲佳耳舟行甚速未薄暮已至河口檣竿林立舟人估客語麗雜不可辨人定稍息望隔江遠樹叢薄時露燈火薄醉就寢

二十二日曉聞篷背小雨灑浙連日甚暄仍去裘着綿衣兩重故宜有此雨時作時止亭午後仍見日影至晚則餘霞滿天晴景絢爛矣半日行九十里抵弋陽郭小住復行自河口以來水碓漸少或三數里始一見近岸臨江亦不甚爲舟行之累過弋陽遇一灘大石爲底延袤數丈急流織其上如紉縠蹙縮數十舟或上或下崎嶇其間叫號之聲震撼山谷岸上羣兒笑呼應之我舟已入洄洑勢不得下後船教之左折初不之信卒如其言始迴旋而下人之不可執拗自信如此遠望煙嵐葱蒨秀出諸嶺顧況有弋陽溪望仙人城詩意其是也道中捕魚者有釣竿有釣車釣車者以小輪繫絲其端懸小魚以餌之中流擲去以輪曳之類吾鄉叉魚擱鼈之法然未見有獲殆疏于術邪不然何不爲垂竿之易也亦有三四小舟載網罟而來者不僅以烏鬼捕魚矣放翁弋陽江上詩云丹楓岸邊雪色鱸下有老翁方捕魚欲求妙手親畫圖王維鄭虔今世無頗能狀此景物夜泊一灘側聯榜爲鄰宵中風色狂橫搖兀簸盪殊甚倦極始能寐尙一夢數驚也

二十三日晴隔宿聞狂飈怒號意必西北風作寒曉聞舟人整理篷席則仍從東來但小耳暄暖尤甚幾欲卸綿襦罷已達貴溪時早聞張天師欲東上候吏刺探至是有三版船九隻駐岸旗上大書襲封五十九世真人府貴谿令遣隸奔走設優樂以宴之憶去歲江右六七月大旱大府從民欲延天師至省未至間有陰色咸謂其道力所致既至旬餘設壇場具醮祭官吏重足土庶蒿目而赤日皎然炎熇尤甚越兩日遽巡辭去時余已在南昌惜未一覩其威儀但緣此爲之素食十餘日意殊恨之後聞其去爲一小官

所毆擊幾至狼狽可爲一噓天師之名於古無有惟唐人小說中有所謂申天師者他不見也夷考家世范書所謂五斗米術晉時王獻之奉其道自後迄無聞不知何因遂來此間據一山得世祿至其所述居官成道及他靈蹟皆自其徒紀之孰爲而孰傳疑不能明也人世鬼神道術各有興廢古之社稷秦漢之五時陳寶竈神社主八通之鬼六朝之蔣帝皆於今無聞而今之所崇奉者又古所不見神仙方技代有其人洪佳赤松蘄子訓左慈于吉之類後亦無言及之者張氏乃崇鬼道而得世其家又理之不可曉者也是晚置酒與壽生縱論他事及鬼神妄誕之說因復及此晚去貴溪二十里野泊人家村落

二十四日晴午後風轉西北勢方未已雲容黯澹波流渾渾兩日極暄欲爲醜寒之地此其先聲也舟抵安仁榜人候風不能行與壽生登岸入城街衢蕭寥市肆皆無所有惟飯店三四家老嫗應門旁穿曲巷婦女三五聚處滌場曬穀吠犬祝雞沿山之田所植非蔬非菘不知其名櫻櫚極多皆垂小實黃沙赭石間犬聲如豹尋路回船已曬黃矣連日順流揚帆不知其適一夕阻風便覺懊悶見來船翳篷如駛輒生羨妬心之難平如是明劉尚書元瑞是此邑人與孫太初諸人結湖南雅社乳羊沽酒風味猶可想見文衡山所爲作神樓圖者也余嘗屬奚鐵生作神廬圖卽師其意令我懷古愈深

二十五日風雨舟人殊無行意強之始行一二里以風大不能前復泊篷不可開偃仄昏黑悶人之極平生阻風所在多有此風亦未甚橫而長年瑟縮畏蕙鄰舟數舫亦高坐視相風烏江右水手大都劣於身手如此傍晚風稍定雨亦時止復開行約二十餘里去龍津尙兩舍酒垂盡恐明日不繼省嗇飲酌不能酣適夜極寒被雨重猶若未足更以衣覆足間燈炬夢醒雨點浙瀝聞童僕鼾聲愈益淒然成聯句一首  
二十六日曉已放晴風止始放舟行間或挂帆江路紆回亦時有順風也將至龍津驛二十里烏柏森布如翦如截深赭淺赤照灼江流餘霞助其绚烂遠風浮其積豔俯仰水天意深魚鳥灘石既隱明沙漸圓

霜重蒼白風寒穠黃疊障混碧單椒秀青惜無亭樹爲之映發耳至龍津薄暮詢之候人邑令撤闌後尙未歸此間令君吾友程君沅癩也數日沈滯舟篷至是謂可得一劇譚痛飲人事不可必有如此者又聞竹士亦於前一日由此放櫂酒已竭邑著餉一壺撐節飲之可達南昌此外更無愁矣是夜泊龍津

二十七日晴舟人勇於進取夜半發龍津與網船相觸爭鬪忿鬪語侏儻不可辨午後至瑞洪乞神福錢市酒脯以勞編郎以明日將過鄱陽湖也凡舟行上水則於河口下水則於瑞洪亦猶江山船至蘭溪必宿留也諸水手皆洪飲大啗未上燈已企腳高眠矣壽生聞鄱陽湖之名欲早起眺覽意其稽天巨浸長風怒濤有壯心豁目者余匿笑而已自貴谿以下灘平水漫水確已盡勢不能作也由安仁至餘干兩岸山俱盡遙岑寸碧曠朗天末汀迴沙聚時見獨輪車鹿歷其間風物劣似吾鄉村落但荒略耳是聞魚多而賤舟子百錢買幾一斗米價亦視玉山以來遞減二十之一較吾鄉不及其半居民生理宜裕然猶多菜色何邪夜宿聞擊柝巡邏終夕不息當由販賈船多集於此也

二十八日曉過鄱陽湖僅二十里有餘余臥聞壽生已起掀篷伫立俄聞其笑語聲若不愜所望者已而寂然掩篷起視之方據案疾書索觀其藁得七言一首語雜嘲諷余笑曰此君期望太厚湖不受嘲也亦作五言二首是日行終日四無一山意謂今夕必抵南昌問之舟人云尙有一站雖多嚮言要不能到矣未晚僮僕已具食若欲其早寐蓋連夕縱譚燭或三換此輩不知何語而久伺不寐殊厭之也飯畢尙未定更思飲復令暖酒羈旅行役將而月矣胡爲栖栖不遑甯處徐孺子之言令我心惻賴友朋杯酒藉以慰雖爲是輩怨怒不暇顧矣此間不知何地亦不知去南昌幾里飲畢甘寢

二十九日晴辰刻已達南昌舟泊滕王閣入城至竹士寓齋夜還宿舟中

東路記

陽湖惲 敬著

南昌城下溯豫章江南至贛州東北折溯貢水至瑞金共一千五百里敬上事及赴行臺省期會皆由之此西路也東路止八百九十里嘉慶十一年十月二十六日己亥奉回任檄出進賢門宿舒白香天香館寢甚安

二十七日下晡發行六十里宿荏港夜大雨

二十八日早發泥濘不可行行六十里宿進賢大風寒

二十九日晴早發行九十里宿臨川署中秦臨川言于清端公成龍作縣事甚備

三十日上晡發行六十里宿桐樹亭桐卽桓山海經注所謂葉似柳子似棟者是也桓音近華華近和漢書尹賞傳注桓表陳宋之俗言桓聲如和謂之和表師古曰卽華表也和又近何俗遂作桐

十一月初一日甲辰朔早發行九十里宿南城過曾香野鄧蘭士蘭士從弟鄉州

初二日下晡發取便道吳白草堂在城南不及過行四十里宿揚村

初三日行八十里下晡至南豐王南豐滌硯十一閱之渡河復五里宿楓嶺

初四日行八十五里宿甘竹雨

初五日行三十里下晡至廣昌復三十里宿竹橋

初六日行九十里宿甯都州

初八日早發行八十里宿葛藤凹雨

初九日行八十里下晡至瑞金

初十日上事南昌至南城皆平道南城之南始山行麻姑山旁薄有靈氣其西南隱然浮一峰雲氣界爲

三成如仙嶠搖漾不可測最上一成雲氣背落日如紅綃真奇觀也問之則南豐西之軍封山蓋拔見在  
二百里之外軍封之南至甯都多石山千幢萬旗皆南指然無如軍封山者廣昌之北盱水北流至新建  
與豫章江會廣昌之南二十里溪皆南流又三十里復北流又三十里復南流皆不可舟四十里至甯都  
會梅水可舟甯都之南溪皆北流六十里至九段嶺始南流四十里至嚴阮復北流五十里至麻子隩復  
南流不可舟三十里至瑞金會貢水可舟皆東路也貢水至雩都會甯都之梅水至贛縣入章水合爲豫  
章江卽西路也豫章江至新建縣北入鄱陽湖

鄉程日記

秀水王 相著

余籍浙江先曾祖宦宿預隨葬於此吾祖吾父祔焉迄今子若孫六世矣余生長於宿未至鄉土自營先府君松楸畢即無用世之志欲屏棄塵氛徜徉山水豈意俗緣難謝如行泥淖中愈奮愈陷忽忽流年已過半百舊業質肆紛擾羈絆決計棄去家事付之兒輩青鞵布韉以外一無所營思作近遊當自故鄉始去年十月家姪文瀛自喜赴選汙道省余於歸仁集新寓備詢鄉族近况十一月家兄香林桂書來道老疾日增更為馳念遂於庚子正月燈節後擇期就道自顧髮白齒脫步行不能五里無濟勝具矣惟飲噉如常差自雄耳

二十一日偕成世講序東攜兩僕起早至白洋河戚好程君益功邀余偕王君輔之安君培之晚酌其兄仲和自袁浦來云由此將過余居

二十二日游戎李公輝連母壽觀劇至四鼓其少君年十二擘窠書已端勁

二十三日雇黃河船至鐵心壩定次日起行李游戎復邀過飲與城守張公嘉桐鬪酒皆儒雅薄暮內弟陸君敏亭來會曾定約同遊也其兄春堂送至次日別去

二十四日早飯後偕敏亭序東登舟東北風大不能解纜安君培之復扯至其家晚酌更餘培之輔之同送至洋河小關作別余曰此亦陽關也諸君得毋歌折柳乎大笑而返

二十五日風逆竟日行四十餘里排悶有作似爲湖山斬勝游天風日日滯行舟十年一度重移權尙有殷勤舊石尤自戊子歲赴蘇往返逆風嗣後十二年未嘗舟行自尋冷徑自成癡滿肚皮裝不合時請看好風頻送處鹽河灘賈

擁高貲新令票鹽賞船官軍護送

二十六日辰刻至桃源渡口襟丈王君崇堂來船話別隨復送肴烝至風大停泊未移更餘風挾雨益甚

驚惶不寐靜思名利二字我為著那一件宜欲書空作咄咄怪事也如謂清遊為造物所忌古人曾言西湖為目前盆景非驚險縋幽如謝家山賊者比何至若此如謂鹽河漕賈一語觸造物之怒則又自視惡詩太高蛙鳴蛤吠恐未必及此還是石郎尤娘等候已久十二年不見登舟一旦相逢竭其伎倆大抵為鬼擲揄耳與神無干復有作云急風挾猛雨夜泊大河涯三峽迴瀾倒千羣鐵騎馳皇皇羈客夢渺渺故鄉思自問無塵念何因更履危

二十七日風微緩雨竟日仍泊桃源渡計登舟已四日尚未出境慨想當年漁父出洞之易豈今日桃源固與昔異邪是夜四鼓後聞大風自東而西起止有迹枕上同呼舟人語無應者恐復成暴懊惱不眠風三起三歇經過之迹不出五里斬然而止不離故處真神風也良久天欲明聞榜人曰好風驚以為仍逆也呼問之曰半日即到矣臥聽起杙聲打篷聲又似出谷之春禽寄謝桃源三神山下大風引去一凡人矣

二十八日早餐未畢已抵清江同序東登岸泥深不能步坐小車至張家馬頭雇會試回頭船包送蘇州因丹徒然壩也看定後序東回原船發行李過壩余至程胡二宅探親晚宿新船

二十九日清江河南拜客中河通守黃艾圃處早飯山安署訪陳君錦章不值探宗兄子若未到留信致之署海道立齋祝公附家鄉信余乞印簡討關

三十日早發至篆香樓問禪友淵如圓寂時事其師嚴山述之詳并出其遺照乞題相對淒然後前行至淮陰城訪李生鏡甫入書室壁上尊甫少白君四十二歲小像丰神宛然余舊盟也誦湯賓尹哭友句云三年地下君安否人世風波不可言是日兩經亡友故居昔年觴詠此日黃墟殊難為懷鏡甫送余返舟途中遇丁孝廉儉卿未識面之神交也訂歸日篆香樓看玉蘭之約晚泊寶應



二月初一日午後過秦郵入城小步更餘抵露筋祠欲觀三十六湖樓樓造於道光十四年余所未至也敲寺門秉燭而登樓窗未啟與不到同寺聯以曼生五字爲最而夢樓集漁洋句一聯徧覓不獲問之寺尼曰不識字不知此也權小舟回船晦夜昏黑寒風淒緊音人游興未必若此

初二日開船風逆序東躍躍欲上拉敏亭登岸余不能從舟漫衍至瓦窰堡二人待於岸入舟憊極蓋十餘里無所獲也日下春方抵揚州泊徐甯門入城至圓明橋晤書賈汪君殿華問鄭君吟香信皆不悉或云久赴清江嚴城欲閉恩恩返舟

初三日復入城卽偕殿華步至天甯寺遂迤邐過東園梅花書院復權小舟游小金山蓮性寺桃花庵沈陰風緊未及平山堂興盡而返蓋自齏政一更數千載繁華佳麗一旦灰飛煙滅余以舊游之地不可不重見十年來景況至此則斷瓦頽垣欲下河滿聲中雙淚矣徧尋壁上留題者止野籐牽上斷窗櫺一語餘俱不成句還入城訪黃琴川乃吟香之戚也確詢吟香琴川以片紙招之俄而譚心一尹幹庭并至共坐茶話以待少頃吟香飛奔而來面已汗喘息少定方言去秋病幾殆仍不能執筆所以三載無書也語未晰日已暮雨浙浙下呼肩輿回船汪殿華譚心一言雨送至南門館驛前雨黑泥深余卽命來輿附之回城是時路經響水塘聲如瀑惜雨注不得一觀也是夜風雨徹曉

初四日早發風色頗利日已晴辰刻抵江口風猛雇兩船帶江敏亭尙有懼色余繫風兜踞船層望金焦兩點萍浮水面隔江諸山如屏障風正帆懸波平如砥披襟不讓大王雄矣烹棹頭縮項編共飯序東曰得此風渡江吾人之福余曰苦盡甜來或有之遽云福乎飯未畢倏過焦山腳下吐哺出觀寄語焦仙風利不泊午刻抵丹徒聞水落不能起板候潮須至亥刻則又彳亍野岸無游觀處矣

初五日風不順四上上縴盡日牽曳僅抵呂城自登舟以來雙槳搖漾不能握管是日舟行平穩與敏亭

試一發筆各作書畫以寄興兩夕新月娟娟頗稱良夜奈荒岸寒風不能出步耳獨是揚州一夕雨急雲沈泥深坂滑倉皇陟險夫豈由人靜言思之平山一路憑弔荒涼故友追尋存問寥落不過取徑太冷而自省無一毫人欲之私何其尖辛促狹如是不似高天厚地所爲卽云會逢其適亦何相值之巧邪枕上序東忽誦一詩曰青鞵布襪寄游蹤虛過雲山幾萬重我亦追隨尋勝境不曾遇雨卽遭風余隨聲應之曰莫將躑躅歎行蹤近隔蓬山只一重試向綺羅絃管地從來無雨又無風打油釘鉸出韻可通韻亦可發笑而已

初六日早微雨午前止晚泊洛社距無錫尚廿里連日入市見江魚之美淮北所無誦前人句最好鮰魚吹雪上水邊亭子正琵琶庶幾遇之

初七日已刻至錫山驛欲游惠泉途中泥滑返舟遂發日未落抵滄墅關過關前行風色轉大余笑曰止此三十里任爾尤娘肆威封姨助虐諒亦吹不回轉矣二鼓泊閭門晤嚴君棣香得子若信未曾北行明日可晤矣

初八日早晤王子若觀硯史摹石訪府署王復齋未至盟允馮鏡堂參戎來船茶話良久晚櫂小舟訪朱君青立過新市河橋深巷曲徑尋問甚難而蘇城內外船無處不濟路無處不滑闐闐煩囂殊不可耐初九日子若邀午飯是日驟暖重裘盡解脫帽去領止著輕棉襲衣汗猶泂體夜半聞風起

初十日問至西園邱宅文瀛姪媳母家也適歸甯得見詢嘉興近况又至桃花塢訪吳秋裳表弟云赴安徽進謁姑母知新選河南宜陽縣典史方擬攜赴任也是日風冷陰沈欲雨仍襲重裘猶覺體粟勦市酷一斗立盡氣微舒就尋桃花庵唐六如遺蹟六如縱酒頹唐并不肯以著述自見曰後世知我不在此世人競以才人目之淺矣憑弔歎歎不忍去庵經唐陶山萬浣雲兩公重修未數載屋宇尙整潔然問路時

曰桃花庵居人茫然有知之者曰準提庵也乃得至其地心訝之諦視懸額徑爲準提庵亦尚有古桃花庵一額隱於門內尋其遺蹟所謂夢墨亭者無有也問之寺僧曰重建時卽題曰文昌閣未久燬於火既死難保百年墳重爲三款

十一日原船前赴嘉禾四鼓開行聞水聲濺濺知風利甚喜又聽落雨聲遂復曉眠至辰已間起問已抵八尺地名約六十餘里雨亦止早餐未畢又至平望上岸小步暮虹橋望裏湖湖中亭樹在水中中央可望不可卽耳日未落已抵禾郡此行千餘里中迅速未有逾此者泊東門入城尋至府署西躡賓橋錢甥友石宅晤家兄香林姪金士鑿兄病左臂神尙王飲頗豪相見喜慰詢悉先坐自高祖以上均在杭州命鑿同往拜掃因曾隨其父謁墓而杭城宗族絕無通譜者故也期於十四日前行回船後夜大雨徹曉

十二日早雨歇復入城與二兄細話遂共飯畢尋鴛鴦湖煙雨樓水澗風寒不惟游人未至并鳧鷖亦絕迹樓已圯不敢登時復陰沈煙雨迷離中名稱其實約明日同游陳園園在金陀坊宋岳珂遺址○國初爲曹秋岳倦圃復屢易主始歸陳氏今尙爲游觀勝地晚宿舟中雨復大注

十三日雨少止復作不能登岸遣人呼姪鑿來船共發待其至已及午風亦不順行五里許至三塔灣遠見方丈大字曰盡忠報國知是岳王祠急命泊舟言雨敲門而入題爲金陀支祠殿宇整肅廊舍精雅曲折有致楹聯畫壁無處不佳小坐茶話不忍遽起若許爲王門斯掃有餘慕焉蓋自揚州東園精舍而外此爲絕勝雖屋宇較少而幽趣過之詠武穆事佳篇最多記見一短章曰臣飛死臣俊喜臣浚無言世忠靡臣檜夜報四太子臣構稱臣自此始殊冷峭惜未著作者名余世母吳太孺人清閨遺稿一律云問誰謀國反鋤忠共戴鸞天半壁中臣子已成三字獄父兄猶望十年功森森大樹枝南向赫赫英姿髮上沖宋室諸陵何處覓西風殘照恨無窮嚴毅沈痛非閨閣常語他日擬勒一石敬致之祠以垂永久祠右卽

古三塔寺○○○純廟賜額荃禪寺者門前三塔已損一頂寺宇頽壞絕無一僧又行二十餘里過本覺寺對岸有住槎亭坡公詩三過門時老病死者此其地矣晚泊妙智地荒驛數家而已雨霽雲開月已向圓惟寒風料峭不能啟戶計此行已兩旬餘未得登臨之樂如揚州如嘉興皆為雨所逐蘇州則濃雲閣雨甫發船而大注若桃源之別風淮雨惡作劇矣前途將至杭州不知陰晴若何耳

十四日逆風行約百里過石門縣阜林驛住五旺距杭城尚七十餘里是夕微雲淡月無所觀攬

十五日五鼓呼榜入發船曉霧未開敏亭枕上發願至上天竺祈晴余曰須記望日清晨出此一語當虔誠致敬也日上至塘棲訪姚致和堂購痧藥市中牌匾同者不知凡幾惟戲臺後一家有乾隆間杭嘉湖

道清公贈額誦芬壽世四字明代誥軸二匣煙鏞塵封幾不辨字諦觀之眞舊物或可信耳午後抵杭城泊倉基急登岸步至天竺頭山門逢僧大茂細詢路徑茂師謂由下天竺中天竺上上天竺登陟二十餘

里景亦未至勝絕若紆道循湖壩可纖舟十餘里取徑靈隱徑登上竺紆折間水陸各半則所歷皆湖山佳處矣余與敏亭共欣躍明晨當齋肅前往也杭嘉兩郡所至多見攢墓停柩不葬傾圮者任其坍塌新

搆者又灰堊翼如矣向曾久聞其弊今始目見河岸田陸方隅隙地無處不有焉詢之土人曰劃地一畝可置數十百間地一二分可十數間收其稅錢所入利什伯於插秧種竹謂之山虎地師復助虎為虐攢

而困固無遷葬之資苟享矣遂謂吉地亦無遷葬之望甚或轉相豔羨而山虎之欲無窮矣纍纍陳死人

有地皆不得葬縱橫墳壙暴露踐踏傷風敗俗害理忍心莫此為甚奈何其不為之所也惟是十年積習

并非有司所能禁革安得御史臺諫言於○朝曰未葬不除服古之制也大夫三月士逾月亦古之制也

請著之功令違其制者科以罪子孫眾多或欲葬或不欲葬欲葬者告言獨坐不欲葬者地師以山向水

口阻其期者坐以邪說惑眾律未葬之子孫已仕者不准起服未仕者不准捐考具結時明著并無停柩

未葬字樣隱者如匿襄律庶民謀食自給者只准覓以衰麻趨事功凡一應官民未葬而易墨經者科以罪既著於律實乃奉行庶幾挽此頹風也

十六日曉日初升踴躍登岸喚小船至松木廠過隄卽西湖壩但未論路徑曲折方徘徊間又與大茂師遇蓋昨自頭山門見師喜其明達彷彿淵如遂與共話良久逮返數里日暮途迷忽與師遇送至舟次珍重而別今晨路經其地特泊舟重問茂師方與其師指揮庶務余笑曰出家人亦不閒因辭去至是而師又至余躍然曰香火緣也能從吾遊乎師欣然遂攜之共上湖船又斷橋錦帶橋平湖聖因寺孤山西冷橋岳墓湖神廟一路爲湖之北面處處登攬目挑心招謂同遊曰小乞兒入龍宮寶藏無下手處矣從此登岸步至雲林寺本古之靈隱○○○純廟賜額今名者由雲林上啟光庵山愈高境愈勝叢篁蔽天泉流夾道昔人題句巖前樹色千花合竹裏泉聲百道飛者得其百一至此則塵念更消眞覺六根胥淨矣余卽欲宿設光不忍決去茂師爲天竺延客余亦與敏亭有願且覲前途之遇又不肯遽止也但足力已疲遂呼肩輿徑赴上天竺比至寺日未暮忽陰晦甫拂塵雨已至僧供伊蒲饌盤蔬無一非筍余摩腹曰今日胸中渭川干畝矣飯頃雨大注檐溜已鳴悶悶就宿不能成寐靜夜又暴風數起枕上閉目卽在修柯曲磴則心曠神怡入耳風雨又心神懊喪序東詩興大作倚醉狂吟四壁香客喧囂亦幾徹夜

十七日五鼓雨聲未絕急起盥漱華雨方止爇香登殿頂禮大士座下默念先太恭人數十年家堂虔奉敬留爇餘檀屑捧掃焚奠以告先靈反步下山猶未辨路曉霧漸開霽日欲吐合掌南無敢謂微誠能格神鑒乎還至毛家埠喚小船欲窮全湖之勝朝嗽新沐游興方濃遂由小有天園南屏·亭淨慈寺雷峰塔折至三潭放生池一路湖面風寒料峭已甚毛髮灑淅不能支轉思登山可以卻寒湖心亭遂望而未至徑權至清波門入城上城隍山登文昌閣東望錢塘江亦如衣帶候潮久之無所見此處路接紫陽

山卽所謂吳山大觀者序東賈勇而登余恐力疲坐候之遙望峰頂平臺二人對坐良久有二指謂敏亭曰其一序公也俟其散歸約可至山下起迎問之曰我在山頭招手君未見邪余大笑曰身隔雲屏手亂招我視君身僅數寸何由見手因述高處面江所見親切潮候已過今日當在未初幾刻不過暗長暗消無所謂濤頭百尺雷轟沫濺者居人亦曰惟八月秋潮然耳取道武林門步歸原船日又夕矣計兩日之游環湖一

週撮要攬勝得其大凡惟雲林前山翠微亭高在天半小有天園後倚絕壁鳥道凌空樹色皆奇吳山第一峰望錢塘江東岸羣山延綿不絕三處心知其勝奈濟勝無具徒有羨魚情耳復思此處非有絕險不能攀涉亦非有萬尺穹窿力不能至者約其磴道登降窮極幽隱不出十餘里緣迫於時不敢不惜餘力請存此志他日重來一筇一笠裏糧煮泉以一日窮一境未知清泉白石亦鑿余誠否三天竺道上乞丐

所聚余見老病不堪者施予數錢則數里內望影皆至蠶攤蟬聯不能前行矣香客相戒以直趨不顧乃無一人擾之蓋悍徒藉以游蕩婦女習於無耻卽幼穉亦膚色充澤爲數則什伯千億勢不能徧給而老羸匍匐及及日暮者過之亦何忍歟愚竊以爲倘有司嚴厲一二保甲事耳汰其游手惡習只准老羸殘病者匍匐則厭競解囊而免於溝壑者多矣

十八日清晨同金士姪入山省墓普福嶺爲本生高高祖恆之公八盤嶺爲承嗣高高祖正之公暨高祖含齋公法公牟爲伯高祖介庵公四處兆域拂拭墓碣題字肅奠清醪緬先代之遺規望後人之式起表

阡有待當屬何人不禁徘徊邱壘攀戀松楸矣先塋卽在于忠肅公祠旁金士往探墳親抗俗稱看塋者如此余獨步入祠進至三重不逢一人毛髮灑淅而退其左爲公冢石闕翁仲宛然唯祠宇傾頽不蔽風雨不知祈

夢者當宿何所祠聯無甚佳者覓家陽明題句不可得最後至墓前方見此聯亦近人補書字復不稱問諸居人祠中僧道俱無慨嘆而已還入錢塘門尋至真院西角社壇巷王衙先太僕公舊宅見勤只堂怡

順堂金殿傳臚三額猶存居人已易姓問至後宅仍有晉宗七旬老母出見問其子有四皆以謀生外出問其世系語不能詳久之見其一子號履甫年二十許語更茫然云有叔別居今方修譜詢其地腳尙數里不及往悵悵而返是夕氣候融和月光清潤覺清景可惜柰嚴城早閉市柵深扃曩聞杭郡無夜游者其信然邪抑時節過早寒氣未回故邪

十九日早起復入城訪金洞橋昨所指居址也比至已及午主人外出坐候良久方歸握手不敢稱謂肅坐急詢譜事主人欣然動色自起入內捧底本出蹀躞間展齒幾折余亦出所攜本共覆之若合符節主人與余自譜中第十四分支同爲第十六世少余十一歲呼之爲弟至此方相與中庭肅拜進謁叔母修家人禮旋招族弟一人至共述譜事并及靈感之異獨任刊譜者族弟號小松行二卽主人也一手纂修者亦族弟號晴嵐行十二續招至者也方編輯時一日有徽州親舊十年未面者千里外來入門卽問近日何所作曰不過讀書曰君必於祖宗分中有所事事曰何謂邪曰我未到此已夢至君家坐客滿堂榮悴極其不倫我訝曰君家何事客若是眾也座中一人曰非客也此皆我一家我心異之敢請其故示以譜乃恍然余肅然起曰吾家此事數百年未成待之今日祖宗之靈實憑式之矣又出其已刊紅印樣本六百餘頁方纂至嘉興一支無從通問停工以待卽此接續纂入并無增刪移易處同曰阿哥此來亦先靈感召也余至此亦樂不可支蓋嘉興支譜稿本先繡峰叔祖授之先府君余幼聞庭訓深慮難成三十年心事一日而償此行爲不虛矣杭州自一世祖至十五世墳塋全在自二世祖至十五世遺像全在太僕公大像尙存社壇巷老屋景敷姪虛族雖凋零尙有公祭二集杜壇巷連枝集三聖橋聚玉集余與小松弟約以一二年間當復來徧謁瞻拜乃爲大快也余族多樂遠徙迄今支分派別幾徧天下然自杭嘉以逮宿遷近支通問者寒素則有之或讀或宦極之一藝謀生一無別項雜色之業魯鈍則有之皆修潔自好甘守困苦

一無游手無賴之徒輿言及此共相慰藉荷祖宗遺澤之深庇蔭之遠如此

二十日一昨心事已畢他念皆非所及同游者競市杭產以實歸裝余亦撥拾一二如湖蓮藕粉之屬寓鄉土之情杭產以絲綢爲最余則尺寸無所取亦可謂寶山空返者矣五柳居烹魚最擅名余過其地猶懸舊額臺竟數事闕無其人杭人亦言近年絕非舊製不見佳處慨自南宋宋嫂魚羹馳聲數百載於今亦名存實亡矣杭城喜食鴛殺割日千百計偶一薦俎誠屬佳製他處所無者此來計程千五百里明日可掉船北發矣午西小松弟來船先送刊譜未全樣本畀余帶回省覽以便續輯依依共話不欲遽歸余以自書楹聯并家藏集留贈爲別兩日來驟暖輕綿盡卸早知晴光不久薄暮雲起既昏岸上人盡歸方落雨駐杭州五日雨二次未嘗少阻一步此又遭遇之奇篷底雨聲夜闌共坐重話杭郡湖山之勝余以輕心掉之百未及一慮遽別去塵心未洗凡骨難仙未來則誰信相思既到尤使青山冷笑也大抵湖上諸山造化靈秀神骨天成又經○○翠華臨幸昔人比之西子則入宮嬌倚釵步搖無不增妍助美於今鬢髻妝殘猶有捧心餘態或病其殘毀已甚余曰所損者土木工也先避去土木而觀之其本真未嘗損也若使瓊環盡徹則苾蘿村中絕色他日五湖范少伯容或遇之江南多淫祠杭嘉亦然封號無稽任意捏造以鄙俚之識徇世情所趨荒怪詭誕見之欲嘔舉境奔奉莫敢指斥是時蘇省一二大吏方事釐革有狄梁公湯文正公之風而浙省尙無人正之以肅祀典

二十一日黎明開船回轉自昨夕落雨淋浪不止四鼓震雷雨大注逮曉微歇岸樹青翠欲滴風逆行遲余心中事了感此五日晴光且得意外奇遇從此任有風雨沾濡阻滯亦處之怡然矣終日雨霏微舟中重著重裘晚泊五旺枕上聽雨漫成小詩

二十二日雨復徹夜曉復漸止過午微露日影旋復陰晦未有晴意是日午倦晝眠忽夢鬚落三絳意緒



頗惡敬亭以午夢非時解之理或然邪余書此亦札闕洪庶意耳一笑置之晚泊學繡地距嘉興尚二十餘里

二十三日早抵禾郡入城晤家香林兄述杭州事畢談伊家務未有善策兄自以他語颺去遂起同踐陳園之約園取徑極幽折樹色古秀屏聯几榻皆以前人書畫摹鑄聞主人工鐵筆劇有雅致遊畢蹙與兄別余以其事既無可爲幡然作歸思約明晨再晤

二十四日復晤家兄共飯爲別甥友石姪金士送至船余作札留致錢特齋姊丈爾琳友石之父也札爲金士嫻事耳甥姪辭歸方發船日已過午迎風行艙門晝掩春水方生中流容與不知幾何里忽榜人驚呼大風至頃刻喧呶如沸余起自闔艙門露半面窺之礮雲晦紫煙霾漲天風聲如雷五六人推挽雙櫓欲近岸不可得舵側橋傾水及舟面當此呼吸頃風力迅掃船頭直撞土岸余大聲曰不妨矣回視舟中皆無人色榜人以雙纜繫岸樹顛風不止數人牽挽入斷港淺水避之少頃復有一舟來同泊驚魂方定日已薄暮遽呼酒至先浮一白惜限於量不能以斗而以錢許小盞耳

桃花臨市酷盡一斗舟中則自搗燒春也

二十五日昨夜風雨打窗衾枕沾溼曉視風逆不能行飯後前進五里許抵王江涇復泊離禾城方卅里午後雪片灑空寒氣逼人襲狐裘不足禦猶資酒力數酌後玉山頽矣

二十六日雪霽枕上見日光穿射急推窗遙睇彌望皆亂瓊碎玉曉寒尤甚人言江以南水輒山溫春游卽搖扇何所聞如彼而所歷如此邪昔范忠宣純仁謫永州夫人在患難中遇不如意事則罵章惇曰枉陷正人使我至此公每爲一笑一日行橘州大風雨船破僅得及岸燎衣民舍稍蘇公顧曰此豈亦章子厚所得爲邪余於親知存問亦每舉此言午後卽抵八尺泊舟榜人不肯行云前途夜警大都榜人家近此處戀親舊耳距蘇城七十里

二十七日辰刻抵蘇過葑門謁堂嫂錢孺人會川之母也亦以所存支譜畀余以備參校慨想先兄獅巖作甯朔令時欲興修譜之舉余聞金士言及取所存本錄成副冊方擬寄去而兄歿於任所事遂不果豈意今日轉以付余可勝嘆哉余雖因人成事其慰懷亦不啻自爲之也未刻方至閩門登岸寓南濠葉家

二十八日出入閩門爲人附書事余無殷洪喬堅識定力未免曲循人情竟日惶惶并不能訪及舊友率老夫以至於此東野詩有句云長安無緩步余讀之每失笑以爲偶一地偶一時耳而孟公造句刻毒至此茲竭來吳門四次矣實見閩門內外無一日不然無一時不然晴亦然雨亦然覺此方之人一生有奔無走始信古人語無泛設

二十九日晤子若知復齋已至急往府署得見甚喜太守李月汀先生瑣瑣過談并許爲視史著語時已擢江甯鹽道交卸恩也

三月初一日馮鏡堂盟兄招飲以其先將軍行述囑余參定薄暮復雨

初二日襍被過子若留宿余就以就醫也晚邀復齋共飯二鼓別去約明日同遊獅子林

初三日清晨子若診余脈規以息心靜養良朋深愛可感然余近年百事皆慵或亦庶幾也復齋復來遲敏亭不至遣人偵之又不值復齋廢然欲返余挽之拉汪銘山同游遂行不里許忽與敏亭值游興復勇至獅子林雲林舊址陟降盤繞如鼠穴蟻磨筆筆以逆折取勢文心九曲於此可晤余自武林真山水處來到此別開一境以數拳之石一畝之宮令人登陟不厭人巧錯天工矣余語敏亭曰古人事事必使千載後無能及者然後可傳類如此林以樹石取勝然至今日古樹已漸少所懼有損無增石亦傾頽後人修葺似有位置乖方者非復舊觀矣繼此而陵遷谷變可勝慨然又登北寺塔塔高三百六十尺陟其巔

俯視金閭萬瓦鱗次亦奇觀也

初四日做裝登舟約舊友嚴星海同行午後放舟虎邱余因閨門喧囂紛擾疲倦已極急遣脫去若離湯火是夕氣候喧和新月娟娟與敏亭星海共坐千人石上說此處雖燈火樓臺猶有一席清涼地不似金閭眞使人無所逃匿也時當路政尙嚴肅方禁游女燈鷓風箏之帶燈者自虎阜禪林山門而上余三人外亦未逢一客也

初五日早起暄暖止襲輕棉午後風雨旋復重裘暮抵無錫此舟微寬敞可列小案理筆硯惟迎面風來并兩旁窗皆不能啓船頭山色窗隙偷窺自笑閉幃作新婦也

初六日仍雨望惠泉不得至疑或山靈拒客請迴俗士駕耳遂發船風逆行遲五十里住奔牛是日拊檣筆墨了蘇城宿通并作鏡堂盟兄書商其先將軍行述附星海卻寄

初七日辰刻抵丹陽訪席升之寓練塘庵適出外待至午不返留一札遂行距江口尙百里余祝曰倘借一帆風能抵潤州今夕必向大江觀月色一豁雙眸月不落不眠也日暮竟抵鎮江城下江口聞未啓板舟不得前泊西門余欲登岸望江舟中無應者惟序東從吾行步三里許至江岸漕艘停泊舳艫銜接障礙不能展望復前行二里許帆檣盡處豁然開朗新月正中江波浩渺指對岸兩三星火是瓜州者隱約見之平野瞻眺意猶未暢復折而登銀山斜月半明石磴盤曲林容若夢棲鳥無聲琳宮靜閉隔窗燈火迴若晨星倚石俯視江天水月一望無際心神與之俱寂徘徊不欲去迨清影將沈始返舟寢是夕氣微和又得臨江勝地五旬來閉置鬱塞之氣往返絕未會得月夜一遊略一據寫而靜夜空山不逢不若雖無路鬼椰揄亦被世人目笑矣明晨待聞當爲城南鶴林招隱之遊

初八日枕上聞雨聲驚問駭嘆城南之約咫尺不能移步非昨夕拚命游山併此亦不可得信矣清景當

前少怯卽失之矣將午潮至啓聞尙喜無風遂放舟入江延緣金山郭摹指瓜步翦江而渡溟濛雨景幅幅畫圖勝於入寺品中冷一勺者敏亭極喜之曰仇實父仙山樓閣圖也余曰可記來時飽看焦山今日歸來又補金山來時旣長風破浪歸日又細雨春帆不知是天公有意作成抑是我輩能隨緣領略卽所不得到者亦是留有餘爲將來再補地耳終日雨不絕泊瓜州由閘關上

初九日盥漱畢過高明

敬避

成廟諱

寺共登其塔七級耳不及蘇州北寺塔之半然已冥冥孤高多烈風矣

知客僧濟川應源宿遷人也敘鄉土之情因及如鑑上人爲寺僧法祖敏亭會藏如公雲水同參小照允其送歸寺中亦一重香火因緣也午後到揚城訪前雨中送別諸友譚心一已赴金闈汪殿華留飲遂宿其家

初十日早起招吟香共話庭贏如昔聾益甚而氣色頗佳問其所寓尙可久安但形影相弔亦文士之可憫者薄遺之珍重而別過市買一湘妃竹舊扇同人競採珍奇余亦聊復爾爾申刻開船風甚利三更抵車絡壩半日行九十里

十一日風逆竟日行七十里晚泊界首月有暈余曰月暈而風序東曰有口風無口雨兩人各述所聞未知其應若何比寢月色如畫

十二日未曉風雨齊作黎明雨歇風益甚昨宵占驗造物竟兩應之豈爲吾人解紛邪二鼓抵淮西門自蘇郡登舟時漕艘交錯渡江後前幫已遠後者不繼遂數百里不相值舟行坦夷殊非易得至此前望則帆檣林立矣兩日拈弄筆墨敏亭作吳山候湖心亭一圖余爲淵如題遺照

十三日五鼓開行過淮關城中皆高眠未起趨行至清江從張家馬頭過壩渡黃河抵揚莊已初更矣宿中河工廠蓋河道惟此處最爲盤錯淺成畏途遂過淮不入失丁君之約心頗悵悵外此曹鎮齋司馬靳

國華守戎款留固辭之距家近而歸心愈迫矣

十四日早揚莊開船晚泊眾興馬頭對岸黃河渡口卽去時阻風出險處也前渡劉郎今又來何心問種  
桃道士王君崇堂及舍弟隆軒應杓來船

十五日將午過鄭曲舊居自此起旱重新檢束行裝敏亭雇小車返宿城余復渡黃宿白洋河

十六日陸行五十里抵舍途中時有顛風欲逞之意非昨晚渡黃又不免風濤之險矣余笑曰此十八姨  
結束全篇掉尾餘波也

此行往返三千里行程五十五日論人事則俗塵倥傯論天時則風雨間阻湖山勝境花柳芳辰所領游  
趣百未逮一止有杭城通譜一節出於望外而夙願未酬者則有三事曲江之潮非秋不旺一也京口南  
山失之交臂二也春網鱗魚節候未至三也若夫六橋三竺之幽尋早荷晚桂之領略且寄今時之夢想  
再營異日之行賸云爾

此圖之說與前圖同。惟此圖之說。則以六五之陰。與上六之陰。相類。而與九四之陽。相異。故曰。六五之陰。與上六之陰。相類。而與九四之陽。相異。此圖之說。則以六五之陰。與上六之陰。相類。而與九四之陽。相異。故曰。六五之陰。與上六之陰。相類。而與九四之陽。相異。

南遊筆記

山陽曹 鈞著

乾隆戊辰二月十三日晚隨仲兄掌文登舟先余至者二客一程凌萬一少年方姓後至者二夜深未通問各就寢

十四日蚤起訊後至爲孫郁先孫倬雲沈美如倬雲久客杭言西湖甚悉遂訂同遊

十五日過高郵望汎光湖驚濤中小舟如走馬輒作乘風破浪之想

十六日泊江口風作不得渡步進瓜州城景色荒淡歸舟風益甚落日亭亭

十七日渡江過金山憶乙丑冬客廣陵與阮且濱高懋修良冶張成六遊平山約登此余畏寒不果今又風利不得泊悵甚入口抵閘舟鱗集莫能前引觴高詠頽然倚枕

十八日黎明潮湧回舟出港轉焦山放櫂迴顧金山彼人巧此天工也及暮下丹徒閘

十九日由丹陽歷常州舟泊城下讀西青散記南望姬山懷趙闈叔北望嘉山懷惲甯溪巢訥齋荆振翔不得見徘徊久之

二十日雨舟子牽筴而行日僅數十里晚泊潘葑或云地多偷兒同人秉燭夜話

廿一日清晨至無錫別同舟諸子寓侯瑤階宅御史爾端先生從弟也與余家世好見其子高官年十五英英玉立閱其文濯濯如春月柳案列五經諸書瑤階謂余曰每夕令周一卷余抽以試如瀉瓶水余浪遊對之歎積薪矣高官請贈詩許之未成

廿二日坐侯氏寓樓惠錫一山在縣之西南錫山有塔惠山有高峰三名三茅峰侯氏樓臨其東窗外平臺與二山斜對是日積雨初霽晴嵐入戶午餘出遊崇安寺洞虛宮是夕與瑤階飲極歡

廿三日泛舟遊惠山過黃埠墩墩四面皆水上建靈官廟迴廊朱檻映帶綠楊或曰墩之長落隨波云登

岸謁明馬文忠公祠祠左東平王廟唐睢陽張公也臨惠泉泉水清沸陸鴻漸所品第二泉也由泉側登山南望太湖如白練七十二峰隱隱可數仲兄攜爆竹鳴其巔林壑答響下遊秦園園廣數十畝池居園之中貫以石徑通以石橋水潺潺如瀑松柏榆桐皆極蒼古杉居一株橫欹池面垂枝拂水贈以詩不忍去梅花亭傍後牆外貞義單姬祠桃數百株淡紅半落瑤階曰錫山之上前令江公搆屋數椽盍更遊時足力已疲不果為家君買扶老遂返舟

廿四日足疾發竟日未下樓

廿五日錫俗有千人會十二年一舉是日士女出遊蜂屯蟻聚舉邑若狂結臺閣以總角扮雜劇綵亭鼓樂羽蓋旗幟瓶花提鑪等不可數計自午迄申目送成倦因假寐寐起別瑤階攜惠泉下蘇州

廿六日平明過潯關舟次官塘菜花夾岸抵圍門寓上津橋徐宅往謁號齋沈夫子夫子司鐸吾郡以內艱歸逾年矣懇懇話舊重坐春風與世兄德培詣聖廟古柏蒼松輪困盤屈諸少年射於圍觀者環之廟左為紫陽書院局不得入循牆東北行數百步登滄浪亭忽細雨欲遊元妙觀不果

廿七日號齋夫子過余寓命德培昆玉偕遊虎邱經五人墓墓上有題句云山塘塘半入如蟻萬古金閭只五人山下叅異獸通入言千人石可中亭遊入布滿無隙地山後玉蘭一株瓏璵蟠鬱昔人詩云霓裳夜色團瑤殿露氣晴輝散玉盤和之未成由石臺百層登三畏閣凭窗下闌空曠無際麥隴菜畦黃綠相錯幽趣遠勝前山余欣然賦之有黃深菜圃花將老綠滿村墟麥未秋之句入酒家微醺返舟德培日前輩某遊虎邱古風一首有句云香車寶馬往來多水色山光領略少余曰斯言信然也

廿八日舟南下帶雨暮過吳江

廿九日風逆抵嘉興飯於鍾子生伯家對岸為煙雨樓熾舟獨上南臨湖面高可插雲右側方亭為湖心



井亭旁大石爲釣鼈磯臺樹環抱四圍植桃柳波光樹影一望參差

三十日夜大雨旦霽過石門夾岸桑柘陰陰行百里至長安壩兩旁砌石中泥坂高丈許絞舟以達上河

過臨平泉亭兩山泉亭一峰巒數十里晚入杭城寓仙林寺無垢房乃倂雲舊寓也

三月初一日邀倂雲暨吾淮關魯二客遊城隍山山在城內城隍廟居其巔羣廟環之後爲三官殿砌下巨石出地玲瓏天巧倂雲曰未若紫陽洞天之奇也隨之穿石而入見所謂歸雲洞者碧雲天者小飛來者紫竹林觀音巖者鼈峰垂雲峰瑞石峰者突而銳曲而懸峭而欹然危窅而滑然滴攀石磴而上則城內外一壠一瓦盡入眼底杭俗樓舍以粉墁山壁高低鱗次對之如殘雪未消朝曦初出時也左覽錢塘江之全右瞰西湖之半四圍石筍嵯峨爭爲奇狀山之巔平坦可數畝遠近張布綉賣茶遊伴多憇闕年老益狼狽不勝一紅裙登之殊翩翩也由山側按磴而下通曲徑爲丁仙亭宋嘉定間全眞了野鶴遺蛻猶存境最幽聞自後山繞前山出迴顧山面米南宮橫書第一山三字蒼秀可愛

初二日孫子倂雲買舟邀余及二客遊西湖清可見底先至所謂柳浪聞鶯者其旁爲錢王廟坡仙表忠觀碑記嵌壁上剝蝕數字轉入雷峰峰亭亭赤立地瀟不得上去之遊淨慈寺寺右貼山左則層樓相累而上濟顛一木井窅然深詭垂燈可照羅漢五百尊覆以田字殿金彩殊容吐金佛三座莊嚴色相非常寺居南屏山之隈鐘聲晝夜不絕至暮遊人散而韻益清南屏晚鐘其謂是歟沿流逆泝至三潭亭前石橋六七折與波蕩漾至花港魚信沈沈猶柳浪之鶯聲寂寂也老桂一株超出羣木從此入境益佳倂雲歷歷爲余指之雲忽起風雨驟至榜人幾不能支久之益猛返權登五柳居醉而返

初三日坐寓齋曉寒逼人住持僧心印精地理所與遊皆當代聞人手韜光紀遊一卷登樓謂余曰韜光在靈鷲北峰右昔人比諸蓬閩兩湖煙樹三竺雲變了了都在鳥下是編彙古人題詠君披此可當臥遊

余受而誦之竟日忘倦

初四日曉晴買舟邀倬雲并二客至湖心亭環亭皆水環水皆山亭後碑詩爲吾郡嵇先生淑子守杭時原韻引舟詣聖因寺湖山鬚眉畢獻几席度西入怡親王祠碧臺朱棟望若赤霞祠內亭閣或圓或方或六面或三角曲廊深塢疊石成巒流水小橋濺濺有韻去此數十步爲花神廟催花使者分四季其屬以十二月及閏爲專司奇男偶女面各如生廟後爲園園有亭以扇名者若風生以船名者如波擁日將西謁武穆廟墓在廟旁雲將軍祠其側古柏陰森枝皆南向秦檜夫婦及張俊万俟卨像羅跪道有挈楹來奠者則武穆廿一世某孫也返舟過六一泉登岸遊昭慶寺殿中戒壇瑩石如玉纖埃不染世傳然燈古佛誕生處

初五日偕倬雲詣天竺甫入山遠聞瀑布聲天竺有三由下而中而上香火以上爲盛沈香大士像高尺餘傳云晉天福間自前澗水中浮至出天竺右轉入雲林雲林者古靈隱也宏麗齊天竺樓上下羅漢五百金彩閃爍與淨慈媿寺對飛來峰巉巖峭勢若懸空下通行徑一洞拔地數十丈巔有竅透光見日樹根蟠石縫中不上而茂就石鑿佛數千像峰下冷泉亭傍亭山麓有石渠甚清渴者掬飲之片石爲橋過橋倚山而立春風拂拂襟袖間山腰石面一圓孔大若錢吹之如角聲遠聞數步自雲林後山出多碎石礙步道旁有小青墓甗瓦完好十餘里至清澗寺寺有玉泉泉上出爲池方廣數丈澄澈見底游魚潑刺灑灑於其中投以餅爭啖可玩去此登舟沿蘇隄過六橋之三四蕩入裏湖彭城李公造玉帶橋與斷橋相顧盼入數里爲孤山山之陰和靖先生墓在焉梅花三百樹僅有存者墓旁爲放鶴亭亭後建祠祠中像望之似玉人左右童一鶴一高風宛然也東過大佛寺白石鑿成半身高數丈移權翹院紅柵橫截湖面函菴隱伏水底不知翠蓋紅妝競鬪時亭亭灼灼當復何如舟過平湖非秋非月無所見自是雙峰

漸遠抵錢塘門迫暮矣

初六日春風驚塵遊人懶出余思傲裝心印強余留

心印法嗣鹿園工詩畫事出未遇

過午天和步城中購龍井茶爲歸

奉計至按察司廳事之左舊爲武穆王第就第立廟廟有銀瓶井蓋武穆女痛父被冤抱銀瓶墜井而死  
初七日別倬雲心印登舟始由上河入杭過臨平皋亭兩山今取道由塘棲過兩山之後去山較遠若  
隱若見杭俗清明日多駕小舟少年試拳勇比刀槳舟行望之不絕

初八日風雨逼舟賦懷親懷弟懷友諸詩午餘晴暖兩岸菜花清芬襲人吳歌低唱嫩白自斟不覺斜陽  
下西崦矣

初九日夜復雨平明抵潯關舟壅久乃得過雨未止風逆艤伏不可仰篷無隙光有王某者附舟窘甚  
分遊資贈之至無錫別去

初十日返侯寓積雨新霽春色融融侯子除漏以浴余因憶花神廟池面石龍止露頭角項空而口張倬  
雲曰此浴池水所由噴出也轉入視之白石周嵌涼燠異池悵未一試今此池雕飾少遜而香霧氤氳亦  
覺俗氣頓浣

十一日瑤階誕辰親族畢至飯後登樓與仲兄談茗閒話兄問余曰睢陽公傳云公長七尺美鬚髯前謁  
東平王青面赤鬚何也余曰公守睢陽力竭時誓爲厲鬼殺賊像殆非從其生云

十二日晝大雨高官笑謂余曰西湖之景縷述難盡君此記無筆漏否余應曰茲行附仲兄之便聊述所  
見以謝吾友潘子漏與否非所計也遂留詩贈別



泛槩錄

當塗黃 鉞著

乾隆五十二年丁未正月謁石君師於杭州時師方視學兩浙招之入幕十八日由蕪湖買舟至東壩

十九日泊高淳縣

二十日過高淳湖抵東壩換船至杭

二十三日到蘇州泊閶門外

二十五日到杭州寓西湖昭慶寺旁王氏小樓樓窗正對南屏

二十六日泛舟游裏湖拜岳墳遠孤山遇雨而歸

二十七日晨起泛舟至小有天園讀摩崖家人卦想淨慈寺參五百應真像

二十八日雨坐湖上樓竟日雲容變態亦一奇也

二十九日泛湖拜錢王祠讀蘇文忠碑蓋摩刻者入湧金門謁石君師於試院遂移寓焉

二月朔復泛湖飯於五柳居

八日登吳山復登紫陽之顛左江右湖真大觀也

九日隨石君師按試甯紹兩府渡錢塘至西興過蕭山縣

十日黎明過紹興大雨船滲漏薄暮抵曹娥壩冒雨渡江換船船狹而長方言所謂艚也彼處呼爲王瓜

船象形耳

十一日晨起過上壩行十八里過下壩壩以土曳船上沃水令滑較濟運河險易迥別

十二日到西壩飯期抵甯波西門入校士館

十三日至三月二日凡二十日扁門試士無可書概不錄後倣此

三月三日訪范氏天一閣閣製樸古子孫能讀書者尙十數人

五日由甯波赴紹興五十里泊螺灣廟候潮廟門有古樟可兩人抱一枝橫出長三五丈

六日曉過餘姚日夕渡曹娥江謁曹娥廟讀蔡下重書邯鄲淳碑徧觀畫壁殿左右並祀兩龜一宋嘉定

中上虞朱娥方八歲祖母詬其族人族人怒持刀刺其祖母娥救之遂被害一明洪武初山陰諸娥八歲

援釘板認其父兄冤事白歸釘創發而死朱娥在宋已立廟俗呼為救婆廟今但並祀於此少東啟鑰有

雙檜亭亭榜猶宋懋陽張卽之書後卽曹娥墓

七日曉行大霧中飯於邊門山下鑿聲了了出深谷十里至紹興西郭門入水關約十里始抵行館

四月五日登鼓山拜右軍像像肥澤塑者意爲之耳謁劉念臺先生木主公子約從祀兩廡共十四人海

甯祝淵爲之首淵佐先生著人讚者遠謁王文成公祠公像清奇兩顴高聳目炯炯有光與向所見刻像

無異而生氣加奕奕也過越王祠祠丹堊一新王像豐偉白面烏鬚如俗工所繪天官似少根據

六日舟發紹興去城十里許觀農人競渡三十里至柯亭一更抵蕭山泊

七日早至西興渡江至杭州學使者署

十三日發至杭州按試嚴金衢三屬也湖錢塘而上未至富陽二十里泊

十四日早過富陽暮泊桐廬學畫十數年乃得親吾家子久真面目爲之心醉

十五日發自桐廬入鷓鴣巖飯於釣臺下日夕抵嚴州桐廬至此灘石清激然淺不盈尺可履而行水經

注所謂不掩鱗昌黎所謂不敢唾者信哉

五月四日出游仇池卽仇園在秀山下水石竹樹有荒寒意過城隍廟前有古樟一古柏一柏土人謂

爲城隍神繫鬼獄犯之輒病齊東語也是日雨後街渠流水琤琮仰望烏龍山瀑布如白蠶蠶掉尾於蒼

翠間雲蒸蒸然擁絮出米家父子善本也

五日大雨坐行館一日

六日自嚴之金華八里至石壁剗削如堵思移南屏司馬公家人卦摩崖刻之亦奇想也夜泊三河水瀑漲有聲

七日發三河廿里飯於女步廿里至蘭溪縣小泊十五里至古松潭泊

八日晨發古松潭行大霧中旋即消霽午泊金華南城下入八詠門里許入試院試院宋保甯軍治也廳事後有堂五楹榜曰宋自公堂三楚御史周家棟書周明神宗己丑進士湖廣黃安人曾任臨海令後陞御史巡鹽本省此殆任臨海時書後人妄加三楚御史字耳曰自公者大觀四年知州詹適重建所易名舊實爲野聲亭也元卽州治置廉訪司又改自公爲一公周則仍書宋名也堂後屋七架亦宋眾樂堂遺址政和間知州呂淙建而名也庭有雙柏相傳亦宋植當柏之陰自公堂之後壁東西有碑各三皆宋碑也一題名記慶曆六年領郡事關詠立石始太平興國三年闔象以殿中丞知訖宣和三年楊應誠以武功大夫兩浙路提點刑獄公事權知前後七十七人自慶曆八年陸廣以上字體方整類顏餘則人自爲書矣一崇甯四年聖製御書手詔行書下有跋漫漶詔略云朕奉先志述而行之靡有遺舉吏怠不虔因緣爲姦託法以便私倚令以搔眾令諸司悉力奉行有懷姦廢法不如令者按罪以聞仍令御史臺體訪彈奏按吏是年以朱勳領蘇杭應奉局及花石綱東南之民方撤屋毀牆疲於供應而詔書諄篤亦似重有恤者何贖贖也一御書藉田手詔楷書下半亦有跋不可讀其略云朕惟兵興以來出畝多荒故不憚卑躬與民休息今疆場罷警流徙復業朕親耕藉田以先黎庶察其書法當是高宗其立於炎興間議和之後歟一皇子節度使魏王詔書乾道七年二月立石孝宗行書略云朕以皇子愷賜履大名備藩甯國

仍元袞視儀之貴兼齋旄制閩之雄乃眷東陽實居近服緬想提封之內當知寵命之新令特授雄武保甯軍節度使判甯國府依前開府儀同三司進封魏王按史乾道二年莊文太子卒慶王愷以次當立帝以恭王惇英武類己越次立之進封愷為魏王判甯國府淳熙七年王卒帝泣然曰向所以越次建儲者正為此子福氣差薄耳諡惠憲性寬慈帝最鍾愛雖出於外帝每念之賞賚不絕一騎牛圖熙甯中嘉禾陳舜俞知山陰縣以不奉青苗謫南康監酒稅豪兩黃犢與致政太傅劉凝之跨游廬山陳作歌劉為跋而讐於石歲癸丑熙甯六年正月五日也書譜以圖為李伯時作但誤歌為劉耳山谷拜凝之畫像詩云往來澗谷中神光射牛背而陸放翁亦有跋劉凝之陳令舉騎牛圖皆指此也一留槎閣圖上分書七律一首亦令舉寄題於歐川者後有郎中何公跋留槎閣者在處州龍泉縣濟川橋上下即歐川也縣志何才翁泛西湖偶與東坡話槎洲之勝東坡喜曰得非張騫氏之槎乎書留槎閣三字貽之令舉為詩遂名播當世曰槎洲歐川別名也郎中何公者何偁也字德揚號玉雪紹興二十七年中甲科隆興間為吏部郎中跋剝蝕不可讀蓋刻石距作詩後七十餘年矣稱郎中何公者亦追錄之詞耳按令舉自書為嘉禾湖州志以為烏程人始嘗棄官歸秀之白牛村自號白牛居士當以碑為是第此碑何以在金華翻府志惟補遺載魏王手詔一條餘都無考意此間必有初搨本無從覓而讀之姑書其略而以長歌紀之

六月三日登八詠樓讀壁間石刻八詠詩明米萬鍾書椎搨如鏡細玩之殊不能佳也

四日自金華赴衢州坐蘆鳥船至蘭溪行六十里水清淺僅沒腳薄暮小雨換江山船行三里泊五日天陰晦有風舟行甚適過龍游灘泊

七日已刻抵衢州浮橋入南門到試院院固浙閩總督舊治也

七月朔由衢州解維回杭州順風下灘其駛如箭九十里飯於龍游灘未至龍游約三里許有艾公洞山



腹嵌空玲瓏近以石塞之舟人云於風水有礙殆恐奸人潛伏也二十里至烏鎮泊三更大雨雷電枕簟清涼兩月來僅有事也

二日六十里至蘭溪飯五十里至三河大雨驟至少駐雨止行十里至石塘洪泊

三日廿五里至嚴州十里入瀧六十里至桐廬行三十里泊夜復密雨纏綿過三更大雨如注

四日曉霽涼颼颼颼殘暑將束裝矣六十里至富陽近杭州廿五里泊避潮故也

五日行廿里飯於六和塔對岸已正入署

八月朔張愚溪肇熾來謁石君師共飯劇談而去張繁昌人無爲籍丙午石君師江南所放榜首也

二日已刻愚溪移寓署內

三日同人登吳山憩飛來峰下湖適至第以中秋不得縱觀爲憾蓋又將去湖州矣

四日同人泛西湖品泉於小有天園飯攜鶴樓瞻文瀾閣日已西下急搖舫入城是游也愚溪與焉

六日往湖州一日夜行·里

七日曠黑入湖州右文館此行山水清絕浙西極樂國也館卽柳惲所詠白蘋洲遺址向頗隘歲辛丑有司官重擴之軒櫺雅潔假山叢桂足留人也

十五日大雨夜無月

廿四日聞范攝生比部從戎渡臺過嘉興作書候之

廿八日薄暮自儀鳳橋步至駱駝橋憩書肆中購韻會不得而歸

九月朔晨起擎小舟出南郭泛碧浪湖入小港與菱茨爭道抵道場山麓步至寺中少憩徑登其巔蔭古銀杏下卽舟中遙望以爲塔者北睇太湖隱約見兩洞庭面弁山高不可並轉游何山樹木蒙密實弁山

之陰耳歸與老僧西乾飯脫粟於方丈肩輿下山回舟過峴山尋李相石尊乃大盤石中稍窪如臼耳登逸老堂爲乞兒眠食之地亦可見潮人不好事也

二日自湖州赴嘉興舟發二十里與張在蘆張愚溪持螯飲烏程酒回望弁山猶青青滿眼也  
三日日出微雨至平望驛距湖已百二十里矣六十里至嘉興校士館石君師藝菊日本於庭院

廿二日冒雨出訪俞定生汝磨定生死已經年矣見其父年七十一龍鍾可憐有孤方六歲歸由鹽倉橋擊小舟登煙雨樓風寒細雨不得久徘徊也

廿三日風驟寒羊裘尙不足禦晚過精嚴寺尙多梓樹可證竹垞叟詩

廿四日晴舟發西馬頭返杭州也送張在蘆游大梁愚溪歸繁昌夜半過石門

廿五日復雨午過塘西初更抵杭州大雨遂宿河下

廿六日仍雨冒雨入城住杭州試院四日未出

晦日隨石君師按試台州將渡江肩輿誤出望江門溯江干而上至閘口乃得渡

十月朔三十里至鑑湖飯七十里至上虞之蒿壩換船較甯波王瓜船尙小夜雨約行三十餘里泊不省何地

二日晴行四十里至棗樹灣山水幽絕白雲紅樹掩映茅屋風景不減七里瀧山陰乘輿之權豈能已乎六十里至嵒縣館於喻氏

三日黎明由嵒縣乘竹兜子渡剡溪行大霧中四十里至新昌縣飯廿五里至楓樹嶺大類淙之清流關十五里至斑竹宿行館在兩山中泉聲潺潺竟夜不絕於耳此山行第一程也謝靈運鑿山通道殆卽從此入昔人所謂競秀爭流意亦指此也

此入昔人所謂競秀爭流意亦指此也

四日由斑竹十里至會壑嶺步而上高可百丈十里至大姥嶺靈運詩暝投剡中宿明登天姥岑卽此昔太白夢游天姥吟至云天台四萬八千丈對此欲倒東南傾眞夢語耳天姥在諸嶺中爲卑卑者十二里至關嶺新昌天台分地也五里至黃渡十里至烏漏五里至石板橋飯三十五里至天台縣宿

五日五鼓出城渡清溪五里至苦竹嶺十里至界牌嶺天台臨海分界處志所稱杜潭嶺也十里至百步嶺下卽惡溪憩於紫陽宮雍正十二年奉○○憲皇帝勅修者有亭覆○○御製碑文敘張平叔悟眞大概飯於山樓上四十五里至八疊嶺廿五里至台州府城據山上盤旋而入校士館甚寬廠四圍皆見山面巾子山有雙塔背大固山登樓翠可挹也

廿四日登巾子山山銳而高所謂嶠也浙東凡類此者皆名巾子志仙人墮幘之說好事者傳會耳塔中圯不可登下憩天甯寺復肩輿登城隍山入廟見堂西北隅有古鐵香鑪一大如十石豐狀作未開蓮花每瓣中皆有人名有所謂忠翊郎者疑宋時物也晚飯後登八仙巖奇石林立可愛有屋數楹祀呂純陽言曾降乩於此歸憩大固山下洪氏山居極幽淨山泉滌爲池架以石梁竹樹蕭疏具有和氣

廿六日由台之温十二里至三洞橋橋製如崑崙邱亦目中所僅見十五里至長大店飯於某氏其家新娶婦空其堂房爲會食地綠窗踟躕猶可想見槐簡參堂時也五里至拗嶺盤折而上可十里許十里至釣魚嶺十里至黃土嶺嶺上爲臨海黃巖交界十里至黃巖縣宿

廿七日早行廿里至柏寮飯廿里至盤山嶺極高峻廿五里至大荆溪宿於都司署中

廿八日黎明由大荆游鴈蕩五里至老僧巖巖如行腳僧拱而立作欲迎狀肩項凹凸宛然二里至石梁洞輿了不識徑昇至謝公嶺步而上可五里窮其巔下視谷中諸峰秀削別有天地十里至淨名寺寺僧導游鐵城棧水簾谷一綫天維摩洞憩於僧寮有文文肅八分樹福佛地四字榜其室室後有山類燕子

磯廣濟寺石壁僧曰伏牛巖也元李孝先游記謂如峰脾綴下而剝其中燕巢穹空而剖其戶眞善形容者坐良久石師始至盛稱靈峰洞之奇石梁洞之奧同人皆有凌傲之色急索飯食訖肩輿補游焉靈峰爲二石拔地豎立巔合爲一遠視實一峰稍近如老蚌乍拆旋蚌腹而上幾數百尺平視大光一綫直垂秋七月漢案戶耳中奉大士像旁爲十八應眞故俗謂觀音洞明按台御史胡從憲摩崖又謂羅漢洞也頂罅有泉下注如檐溜左受以方池老僧滄泉煮茗飲客詢以鴈蕩殊不了了下憩靈峰寺十里至龍鼻水石君師尙未行也龍鼻水者亦洞也躡石磴橫折而上幽邃過靈峰而險削不及有石脈凸起作蜿蜒狀繞巖上而垂於龕中末有二竅如鼻泉涓涓不竭別有石承其爪似攫猛虎然龜石細碎若冰裂紋紋中多題名紹興二嘉定三可記者沈存中宋以前無有矣旁復立一碑刻回道八乚筆七絕一首字體糾屈僅能識之出洞前望展旗峰東西並列如門後則石屏峰也五里至馬鞍嶺險削不可駐足四望諸山皆彷彿有象未能一一名也十五里至能仁寺觀皇祐中嘉福院浴室鐵鍋大可貯百斛米五里至四十九盤嶺白石山志所謂丹芳嶺路入鴈蕩西谷凡四十九盤故名十里至大芙蓉巖宿此游惜未觀大龍湫瀑布聞山中人云當以五更時望之日光照灼如五色過此亦略同石門昌黎云團辭試提挈挂一念萬漏欲休諒不能蠡斂所經觀因用南山韻作詩以紀游

廿九日三里至海口塘廿里至窰窰嶺嶺絕高海艦望以爲準俗謂窰半天實丫髻山也十里飯於紅橋卅里至樂清縣縣固小丁明府空其署館石君師

十一月朔五十里至館頭飯罷登舟溯永嘉江湖水渾濁如北之御河距海口僅二三十里耳卅里至温州雙門入校士館館爲巡道舊署

十四日冬至雨

十九日同人游府東城外謝客巖巖倚城頗不高而奇鬱突兀讀宋至和二年題名徧閱石壁尙有元祐字惜剝蝕未能了了轉龍母宮有古樟出巖腹橫穿山樓蟲可百圍蜿蜒而出檐隙奇木也登昇仙巖卽飛雲河劉君升仙處也

二十日肩輿出西郭游谷氏園園雅有結構假山疊成洞壑曲折可喜池魚應聲至檻前就食羅羅可數主人具茗飲憩片時而歸便道登華蓋山望永嘉江萬山環繞殊有奇致

廿一日舟發永嘉候潮小泊游孤嶼登東西兩浮圖謁文信國卓文貞二公祠過江心寺窳壞不可入登舟乘潮颿黑行百廿里至青田縣海潮亦自此駐

廿二日溯江而上廿里至東巖灘五里至播石灘十里至大洋灘十里至洪府前灘廿里至蓮巖游石門洞觀瀑瀑懸絕壁高三四十丈下注如運河啟閘淙淙有聲大風橫截之又如白龍蠕動於煙霧中淵深碧如翡翠廣十丈餘左爲洞可容數十人惜日已暮尋山谷題名不得謁劉文成公祠祠三楹公作道裝儼戲劇演諸葛公者有栗主題帝師神位似於體例未合

廿三日十里至海口十里至小羣灘十里至緊水十里至臘口水湍急異常見下灘木筏觸石甚險十里至石帆志稱有仙人擘永嘉江北山之半置此荒唐可發笑也初更至處州肩輿行五里入城民居荒寒浙東儉約之郡聞路人呼豕作弟蓋說文豕字或曰彘聲之轉耳

十二月十二日偕曾西井廖茶畦肩輿出南門門爲二俗稱水門渡大溪行二里許躡磴而上所謂南明山也石壁橫立中界瀑布志稱小瀑布蓋別於石門也時方冬晴泉涓滴作聲無足奇者折而上一笠小亭冠瀑布巔想大雨時坐此必有可觀少步有石橋長數丈跨印月池過池仰望石梁橫互亦數十丈石突一巖曰獻花巖下題名無算山僧悉傳以丹粉殊失古意轉南有石對峙如門亦曰石門步而入爲寺

山門面廊下視石梁如案又如蒼龍脊入寺亦有橋過橋為佛殿殿中左右有井僧云日月井也天雨常出雲最後為觀音閣左有門行十數步為高陽洞可容四五十人兩崖題名甚多可識者五一沈括王子京黃頌李之儀熙寧六年十二月十二日游高陽洞一晁端彥美叔來乙卯閏月旦一乙卯孟秋孫沔陳復古張帖同游此三題名在洞左壁孫陳題名最深一郡守劉輔之同東平呂袤上饒周昌符來乙卯六月此在洞口右壁一大宋紹興甲子丙寅歲洪水自溪暴長約高八丈人多避於樓屋誤死者不可勝計因紀之石以告後來此在洞外出洞口橫東沿崖壁上有雲閣靈崇麗水縣南明山諸大字靈崇志稱葛洪書今觀隸法不古南明山三字一蠹有米意下皆有跋不可讀翻王順游記米書在獻花巖轉南有門倚石崖間曰南明山米芾書即今石門也二刻殆後人移摹於此不足寶也返想方丈老僧六十餘歲故麗水百戶也茲游意甚愜讀沈黃諸公題名又恰同月同日李端叔以趙人而居姑溪鉞以歙人而籍當塗七百餘年俱集於此亦一奇也

十三日自處歸杭三十八里至劉山之卻金館會食館為明宣德間溫守廣昌何文淵入觀道經括蒼夜宿於此永嘉縣丞于建遣其子間道懷金贈公公笑而卻之過客聞之遂書卻金館三字於壁至今因之館舍三楹在嶺上極高峻對面重巒疊嶂中窪如澗有小山連屬不斷亦高十餘丈也廿里至桃花隘卅三里至縉雲縣宿縣無城四山環之東望仙都殊瑰奇也是日甚暖

十四日卅里至黃碧街飯卅五里至裏溪裏當作李俗誤也廿里至永康縣松陽書院宿書院面溪右有長橋曰西津土人云長七十三丈有屋覆之亦巨製也是夜大雨

十五日曉起雨未止寒甚行卅五里至楊公橋飯五十里至嶺下朱文昌宮宿雨猶甚也

十六日晴廿六里至金華府試院飯徘徊六碑下屈指重來已七閱月矣五十里至蘭溪縣下船

十七日風冷行九十里至嚴州泊夜大雪

十八日冒雪行十里入瀧晨起鉤窗惟覺光搖銀海而已約日中過釣臺買鱸魚羹酒取醉晚泊桐廬

十九日由桐廬百里至富陽小泊乘夜泛舟天明抵杭州江頭矣

廿日至廿三日住使院雪未晴故也

廿六日肩輿出湧金門泛西湖至孤山之陰復由六一泉行素園探梅四山雪映孤權中流酒樓茶肆寂無人聲想見東坡臘日出游時也

廿七日曉起微雨卽止午後看迎春杭人以竹編牛傳以土芒神作白髮老翁與吳楚迥殊也

廿八日立春小雨竟日翼日復雨除夕曉起雨霰旋止默數行程已徧兩浙其中可喜可愕之境詩所不能盡者悉著之於錄浪游幾二十年當以今年爲最暢

乾隆五十三年戊申正月廿三日偕張茗柯魏星來游龍井過某盤嶺徧游三天竺是日曉起陰晦欲雨至龍井卽開齋同游者意皆適以新歲三泛西湖未能及也

二月八日渡錢塘至西興夜過紹興科試甯紹也

九日午後抵曹娥壩夜過中下一壩候潮

十日午後過餘姚百里至西壩宿

十一日抵甯波府

三月朔日由甯波往紹興閱三日入其城

廿一日拏舟偕張愚溪曾西井冒雨謁禹廟觀窆石探禹穴雨大不克至夏鎮

廿二日觀劇夜大雷雨

廿三日歸杭州閱日渡江與愚溪登六和塔讀宋人寫經石刻過虎跑泉未得游

卅日偕張在蘆張愚溪吳玉松曾西井魏星來泛舟西湖飯五柳居茗湘湖葦窰滑膩可味

四月二日自杭往嘉興三日到嘉興

十九日觀劇朱蔚堂至

廿日送吳玉松歸里午刻泛舟至批鹽所李君棟行館小飲偕行者魏星來

廿一日自嘉興往湖州順風揚帆幾不可纜

廿二日未刻抵湖州

五月五日偕朱蔚堂魏星來廖茶畦泛舟碧浪湖登峴山憩於窪尊亭導游役隸猶識余蓋去年曾與之游道場也湖人樸實無水嬉之樂歸舟見有舞大刀者老穉聚觀可笑予嘗論吳興山水清遠民物殷富蠶桑之利衣被天下而服御飲食亦他郡所不及書畫筆客奔走四方若鏡若綿若縐縐若山羊皮若香稻若桑羊若烏程酒若盧橘楊梅之屬填街溢巷取資至足誠極樂國安得起賈耘老於九原乞我三間水閣邪

七日返杭州雨過碧浪湖暮行四十里至菱湖

八日日出抵武陵口小泊塘西買批把啖十餘枚九日到杭州

六月七日偕周曼亭魏星來肩輿出湧金門拏舟抵岳墳復肩輿行二里許至清澗寺觀魚寺占玉泉泉水清澈深三尺中有小塔蓋詭泉眼者蓄大魚百餘頭五采皆具黃如泥金者鱷魚也淺碧如澱者翠魚也竹坑有玉人歌詞一闕云杭州玉泉池中五色魚凡千頭內一種翠藍者最可愛即指此形如編背有鬣上聳如翅者飛魚也道人云飛魚常貼水行覆水面則飛飛亦不能高折而西又有泉名珍珠即玉



泉別派魚大不盈尺色皆作玳瑁金鱗變種非奇品也歸復登舟飯於五柳居又蕩舟至淨慈憇大悲閣入城日已沒矣

十九日范蠡生比部從平臺歸過杭宿於試院劇談從戎之苦五鼓始睡

廿一日石君師飲攝生於試院

廿三日送攝生行

廿五日偕愚溪蔚堂星來游虎跑品泉烹龍井茶歸飯淨慈方丈畏熱不復權舟湖上矣

七月朔將赴江甯省試買舟歸蕪湖曉起辭石君師肩輿至斷河河頭天熱甚閤者爲予買兩舟一載行李一坐臥也晚至塘西大雨小泊卽行夜熱甚不能寐五鼓至連市

二日早抵烏鎮行約五十里大風暴起煩熱頓解疇移時緯曳而上三十里至平望驛

三日日出抵蘇州葑門近午過澹墅關日入至無錫是日復熱過虎邱亦不敢往夜泊無錫西門馬驛卽

四日九十里至小娘蕩蕩田爲水所沒農人卽於水中插禾冀其水退晚成也卅里至和橋行未遠暴風驟至曠黑莫辨何處遂纜於蘆葦中宿

五日四鼓解纜行十餘里至宜興過橋水駛急天明過東洑早飯時過西洑約行五十餘里洑宜興人讀

爲九音之轉耳九十里至溧陽四十里至南渡泊夜熱不能睡復爲蚊蟲所苦

六日曉渡三塔蕩水闊如大江實皆田也日中抵東壩換船風甚利夜渡高淳湖

七日辰刻抵礪湖浮橋

自七月七日還家月望往江甯省試八月廿三日返權九月榜發獲中往郡城數四逡巡至十月無可書

亦不錄

十月十三日復往浙江偕王潤生澤行午刻由浮橋泛舟順風開帆夜泊烏溪

十四日午後抵高瀆日夕渡湖二更到上壩宿

十五日曉起換船訪魏知年楷留飲夢香來書屋有老梅二樹甚奇古昔洪阮溪鑿教讀地今洪下世且

十年矣午後登舟夜宿絳頭

十六日曉過溧陽積金橋小泊

十七日早飯時過無錫行卅里至望亭橋見張帆來者魏星來維舟為道石君師廿一日往嚴州相待甚

急且誦石君師近作喜鉞得舉詩談俄頃別去魏此行北歸也晚過蘇州

廿日到杭州過斷河壩卓午入署

廿二日偕潤生登吳山

廿四日隨石君師按試嚴衢六十里泊虎爪山

廿五日六十里至富陽買酒與愚溪 江道坤潤生小飲四十里至程墳泊

廿六日六十里至桐廬縣風利不得泊卅里至鸞鷲壘十里至釣臺與二張同舟六十五里至嚴州試院

二張者一為練江名 錄丁未進士亦丙午江南榜也

十一月初十日偕潤生出嚴州東門游建昌山七郎廟廟臨新安江旁有亭樹可坐以溪灘碎石鋪地甚

潔俗所謂石氈也道士杭人為言七郎即杭之總管水神也

十一日自嚴之衢坐二張船行廿里歸作畫一幅廿里至石塘洪泊霜月皎潔異常夜取金華酒一壺與

練江潤生小酌二更始睡舵尾有小兒呱呱而泣幾達旦殊聒人耳石塘洪當即沈隱侯集中石塘瀨也  
沈有石塘瀨聽猿詩其云東嶺西巖正所以狀山重沓也

十二日廿里泊桐梓灘會食風便開帆五十五里至上黃山碇

十三日廿里泊裘家堰八十里至龍游泊是夜月愈明潔二張聚談更餘始回舟

十四日廿五里泊檀樹灘飯行十餘里逆風大作灘高水急船且前且卻意甚不適晚泊程碇港

十五日五里至孟江塔日午抵衢州

廿四日長至移寓城西崔氏園園有池樹竹樹之勝與練江愚溪潤生同宿聞水樓上樓窗三面可以眺遠夜靜聞隔城灘聲抑揚不絕始悟樓名徵實也石君師爲名其園曰觀我和淵明移居韻二首贈之衢試院舊爲浙閩總督署自康熙二十年移鎮福建之漳州遂爲試士館頃福公相使節出鎮道出衢州因移寓以待其來

廿四日至廿八住觀我園

廿八日借二張潤生謁夫子家廟拜楷木所雕聖像及升官聖配像五經博士云像猶端木夫子手刻蓋南渡奉以至臨安者聖像首戴冠類緇布製而有二柱又非梁未審爲何冠也歸登城西樓見鐵鑄塔塔鏤飾皆以水中有獸類馬間作山山上有獾下有擔經僧層層如是製甚古樸亦未審何時物也

廿九日登舟歸杭五十八里泊安仁街宿

十二月朔五更開船行卅二里至龍游小泊大風遽作綠波捲雪類白鷗出沒浪中纜逾時復行至暮抵裘家堰凡六十里

三日過嚴州初更抵胥口

四日風甚利曉起已出鷓鴣壘食頃到桐廬未至暮抵富陽城下夜行六十里

五日已刻到閘口肩輿渡慈雲嶺見吳越王篆書勒石云梁單闕之歲興建龍山至涿灘之年開慈雲嶺

使建西開城宅臺殿水閣令勒貞珉用紀年月甲申歲六月十五日吳越國王紀下嶺由清波門入署記  
去年歲暮自處州返輿丁避街市塗潦踰萬松嶺循隄而入清波門積雪四映沁入心脾今年輿丁又避  
街市攘雜由此入取徑既別心目豁開勿謂擔夫只知爭道也

六日借二張潤生游西湖湖水涸飯於五柳居

九日復泛湖飯於清河坊酒樓

十日曉辭石君師鉞歸蕪湖愚溪歸繁昌練江歸江陰鉞與愚溪同舟練江別具一艇因約練江共眠食  
至無錫再分舟行蓋距江陰僅八十里矣潤生送至斷河頭惘惘有難別之色以鉞明年去○京師後會  
恐又經數歲也四十里至王家涇泊風大故也

十一日泊新市是日風更大

十二日風未息曉過含山飯期泊烏鎮薄暮風少息行六十里至渡船坊時夜已半枕上聞船似在蟹簍  
上行曉起詢之冰合不可權矣

十三日冰未平鑿而行過鶯脰湖至平望營前路冰結如雪山濤屋非東南風不可開遂泊於西岸鶯脰  
吳人讀爲亢登鶯通陽韻易解耳脰讀爲登似稍隱按說文登上車也从𠂔豆象上車形鉞以此必非許  
氏說非陽冰改竄卽徐氏兄弟臆說也登當云从𠂔豆聲詩卽盛于豆子豆于登是也古人四聲通轉往  
往如是徐氏兄弟於說文諧聲字輒注曰非聲於可刪去者直刪之玉篇登注亦只云上也升也進也不  
云登車可證李徐諸人所竄易矣此與處州人呼豕作希皆方言之近古者

十四日守冰飯後借二張步至平望過北渡橋憩村店晤小丹陽徐君因約茗飲歸舟冰少開移敵樓泊  
才里許

十五日泊敵樓離平望才九里前路冰猶未泮糧艘復北來相待尙不知幾日也飯罷與二張步至前岸見南北舟聚數千有小船西路打冰僅通一綫糧艘忽乘北風揚帆壓冰而來兩岸復以繹挽之河水頓開萬聲歡沸觀者如堵牆後至無地駐足中流有鮮魚船橫截之遂擠於鷁首沒其半魚潑潑躍去者無算糧艘倒曳之始免於沈自此坦行無礙一夕約七十里

十六日日始出泊閘門九十里至無錫夜將半北風大作練江過舟歸江陰矣

十七日行四十里過無錫之高明橋西南風大遂泊二更開行八十里天將明矣

十八日曉至和橋小泊一夜行百廿里

十九日天明過溧陽四十里至南渡廿里至淺口水僅三五寸船不可行計到東壩尙六十里淺口居民每年於水涸時造撥船以濟不通船長可三丈闊僅三尺有奇如小兒剖竹筍爲船戲者恐小而行緩夜深方得到東壩因宿淺口

廿日五鼓坐撥船到壩魏知年留飯爲買舟至黃池以洋津水涸故也日入開頭二鼓抵高淳泊

廿一日自高淳行六里密雪下暫泊食頃復冒雪行八里舟子衣袴盡溼乃纜於野岸

廿二日雪霽申初到黃池與愚溪至趙東田家東田客○京師登堂拜其母其弟具饌留飯

廿三日由黃池與愚溪肩輿至蕪湖愚溪宿予碧鮮草堂明日送之歸繁昌且訂開正同車北上之約

[The main body of the page contains multiple vertical columns of text, which are extremely faint and illegible due to the quality of the scan. The text appears to be organized into columns, typical of traditional Chinese book layouts.]

閩行日記

德清俞 樾著

正月丙戌朔二十六日辛亥余在杭州詒經精舍門下士蘭溪令吳煥卿以余將至福甯具舟來迎壬子吳引之廉訪來飯後坐小舟度西湖至湧金門易肩輿至江干登舟道經數文書院駐輿遊焉登存誠閣其地在萬松嶺表裏江湖一覽在目望詒經精舍寓樓若在咫尺矣沈蘭訪汪芙蓉送至舟而還癸丑發江干余從前客授新安每歲必溯錢塘江而上今二十餘年風景小殊矣泊楊家步甲寅過桐廬十里而泊

二月乙卯微雨卽止過七里瀧嚴先生祠余往來祠下一十七次未一登岸今始游焉祠毀於粵賊之亂後重建前人題詠都無一存其南有客星樓登樓眺望頗足類視一切覺帆檣皆在鳥下矣是日出瀧而泊其夜雨

丙辰有甚雨日暫見泊三河

丁巳日加午至蘭溪吳煥卿大令來迎遂至其署飯焉而歸

戊午吳煥卿來送遂易小舟而行過金華八里泊

己未雨泊武義縣城北距城五里

庚申至永康

辛酉乘籃輿發永康宿於王碧家或曰王寶街

壬戌飯於縉雲縣遂登桃花嶺宿於隘頭桃花嶺極高峻輿丁頗以登陟爲勞然山徑曲折蒼翠萬狀溪流瀟瀟有聲視七里瀧更幽秀矣

癸亥微雨至處州之廣河登舟

甲子雨過石門洞入觀瀑布瞻禮劉伯溫先生像泊時川渡

乙丑日加午至温州見方子穎觀察裕昭甫太守陳友三大令其夕飯於觀察署中之且園

丙寅子穎觀察昭甫太守友三大令觴余於曾氏之怡園園有泉石花木之勝以叢桂蟠曲爲池亦頗有致其暮登夜航船遂發有陳君仲珊來送追及之於船步立談而別

丁卯遲明至瑞安見孫渠田前輩乘籃輿出城渡飛雲渡又坐小舟至平陽飯而行又坐小舟至錢倉又過蕭家渡而宿是日四易舟忽水忽陸行頗不易然自平陽以南山色甚佳層巒疊嶂蓋即所謂南鴈蕩矣其夜雷雨

戊辰有微雨坐小舟至琳溪壬甫兄使人以書來迎復乘肩輿行自此不舟矣至橋墩門而飯飯後踰嶺度分水關乃閩浙分界處也宿於半嶺塘

己巳飯於巖前至白琳而宿福鼎縣黃星檣大令使人候於白琳饋酒食

庚午飯於蔣洋宿於楊家溪是日所行皆山嶺而大王嶺尤危峻輿行至此頗覺勞動初登輿時四山雲氣迷濛不可辨識及登五蒲嶺已有微雨余默禱於神旋即開霽晴日杲杲蓋神佛之佑也

辛未渡觀音嶺於觀音閣瞻禮小坐啜茗遂行飯於棗坑日加未至福甯府兄子祖福祖綏來迎霞浦令劉夙寅同年及府經歷宋君俱候於郭外卽入城至郡署謁見太恭人暨壬甫兄

壬申羅景山總戎來出至柏翠庵致祭於嫂孫恭人之靈遂拜客見羅總戎劉大令及張小舫太守

癸酉駱景山游府來上官幹臣廣文來是日與壬甫兄散步郡署之後圃見大鐵錨二或云官軍征蔡牽時所得或云郡城象船形以此鎮之也又於三堂宅門外見二石鼓其一有文云至正五年歲在乙酉常住造亦未審其所自來



甲戌

乙亥

丙子孫萊山學使來學使適按臨福甯是日試事畢也余卽報謁至試院小坐而還  
丁丑雨

戊寅羅景山總戎來

己卯

庚辰

辛巳

壬午同鄉王君友梅餽酒食卽招之共飯

癸未羅景山總戎招飲於其署齋

甲申

三月乙酉朔

丙戌

丁亥王甫兄招同羅景山總戎張小舫太守謙集於望海樓樓在龍首山之麓雖不甚高而四山環抱東南隅獨缺於其缺處見海若在檐霤之下因有望海之名矣凭欄下視郡城橢圓而曲如一衣帶然亦頗極登臨之勝

戊子張小舫太守仍招集望海樓述及湘鄉相國有騎箕之信爲之泫然其夕雷雨

己丑雷雨旋霽

庚寅

辛卯雨

壬辰

癸巳

甲午

乙未得同年王補帆中丞書知湘鄉薨逝其說塙矣

丙申出拜客見羅景山總戎張小舫太守劉夙寅大令告將行也已而皆來送

丁酉叩辭太恭人還浙王甫兄及兄子祖福祖綏送於城外新舊霞浦令劉夙寅程九希兩君皆送於郊

是日飯於棗坑宿於楊家溪

戊戌飯於蔣洋宿於白琳

己亥於倪家地舟行三十里復輿行至福鼎縣見黃星槎大令遣福甯之送者歸是日有小雨宿於半里塘

庚子飯於橋斗門自琳溪舟行至蕭家渡而宿

辛丑過蕭家渡自錢倉舟行至平陽飯焉又舟行至飛雲渡飛雲至於瑞安見孫渠田前輩羅雨樵明

府飯於渠田所遂登夜航船羅明府來送遂發

壬寅至温州見方子穎觀察裕昭甫太守陳友三大令遣福甯之輿者還

癸卯既登舟孫渠田前輩使人以書來并歸所遺扇囊及扇又以楹帖屬書乃即舟中付之是日泊青田

甲辰過石門洞因再游焉有林君朱齋讀書其中遂導觀石壁所刻謝公詩老僧餽新茶受之乃行至五

里亭遇暴風不可帆危欲觸於石遂泊舟搖搖竟夕

乙巳至廬河於逆旅小憩遂易肩輿行宿於巖前其夜雷雨

丙午飯於卻金館大風雨踰桃花嶺至隘頭而宿雨竟夕不休

丁未齋飯於縉雲縣遂至城隍廟觀李陽冰碑前縉雲令徐君熾烈字赤木築室三楹以庀碑卽署曰藏  
礪軒碑頗完好惟每行末一字泐矣是日宿於王碧家

戊申雨至永康縣於牙行小坐卽登舟行未至武義縣五里而泊

己酉至蘭溪縣見吳煥卿大令飯於其署齋遂易舟而泊

庚戌煥卿來送坐談良久而去遂發泊桐廬縣夜將半矣

辛亥至杭州泊江干

壬子還詒經精舍



南歸記

桐城方宗誠著

余官冀州之棗強屢乞歸制軍李公不可任九年餘矣庚辰春請假歸省墓且就醫許之六月十三日代者至先是游子岱觀察黃子壽太史聞余乞假歸期至省垣相晤余義亦當謁李公而後南旋二十一日起程過故城登舟二十六日未至靜海二十里泊舟南岸晚大風沈數船死者十餘人余所泊幸避風無恐二十八日至天津謁李公晤吳擊甫刺史呂庭祉觀察庭祉自別○京師不見十二年矣七月二日至保定子壽先因事之通州屬其季子國瑄余至延居古蓮池掃榻君子長生館以待次日余往哭丁樂山廉訪廉訪合肥人有忠孝大節負文武才觀察天津循政著遠邇及爲按察使署布政使勤於政事以察吏安民爲心年甫五十未究其用遽卒惜哉是日晤丁福田軍門廉訪從弟也磊落軒爽遇事能達大體無武人之習余居蓮池以請假不調大府惟署按察使葉公知保定府馬公屢枉過先施一再報謁而已子壽居蓮池主講書院兼總纂畿輔通志其襄纂校者多一時淹雅之士其書院中高才生則有安州廩生陳文煜新城舉人王樹枏永平舉人胡景桂清苑舉人張銓日夕與講論其樂也子壽藏書極多樓上下幾數萬卷余借得崔東壁遺書劉霞軒文集金山集方恪敏詩集安徽通志天乙閣藏書目錄祁刻說文繫傳讀之十三日子壽歸書院日夕講論志局中涇縣吳蘭石太守煥采霞浦吳彝丞大令壽坤武進了江鷺大令紹基樂城張惇德拔貢甯津吳棠湖孝廉潯源皆博學能文亦時過訪閩林子穎大令穗羅田周少白大令錦心昆明戴翊臣縣尉清光澤何幼原縣丞芳稼清苑郭瑞田茂才雲豐貴筑周惺吾大使開陽陽湖趙君堅茂才實或長於地輿或長於人物讀書之暇相與考古論今極朋遊之樂事惟聞俄羅斯以據我伊犁不歸將開兵端而○朝議不定實爲隱憂先是○朝命侍郎崇厚往議和未候○諭旨徑許以十六事中多萬不可許者○朝廷震怒下崇厚刑部議處以斬監候之罪而○命出

使外夷會劄剛襲侯紀澤復往俄羅斯議之又○○命黑龍江將軍協同河北道吳大澂治兵吉林○○命山西巡撫曾沅圃中丞國荃治兵山海關湖北提督鮑春霆超亦統師駐之八月二日曾公至保定公與余有故且知己也三日往謁之病軀當大任不似當年攻金陵城時之英邁矣將啟行子壽及同人贈以詩畫一冊呂庭祉自天津來贈余詩四章余因作題蓮池詩冊後一首子壽又屬爲題劉滄州印存一跋爲子壽校訂古文百餘篇爲王晉卿校閱所著二冊又作周氏兩世循吏傳四日起行過文安縣蘇橋程善人祠敬其行誼舟中爲作記先是自棗強至保定未攜書舟中讀李文公集校訂近著春秋集義至是自保定至天津讀陳白沙集復校春秋集義晤吳塾甫談兩日謁李公一次出城十五里往觀機器局晤故人程曦之香雲階過青縣江大令貢琛屬撰太夫人七十壽序十四日至滄州訪丁福田軍門留談數日謁包孝肅祠余最喜謁古賢之祠以仰止之思居保定一月未出遊惟謁楊忠愍公祠而已舟中讀莊子章義惜抱尺牘惜抱書錄三種古文苑二冊二十六日至冀州謁李鑑堂刺史良吏也回至棗強寓舍九月一日挈眷南旋車行過泰安遊岱廟王母池斗母宮遂登岱頂余生至是四登岱矣咸豐九年八月偕方魯生同治五年夏隨曾文正偕黎純齋李申夫八年冬十月偕游子岱至是偕妻子三人先是光緒二年余仲子守彝族孫濤亦往遊焉余曾作重遊泰山記仲子亦作文記遊一家俱登岱亦快事也過郟城與妻子謁東海孝婦祠過清江得故人張鏡堂遺書於書賈及植之先生漢學商兌書林揚擘吳仲仙制軍所刻也往歲同治癸亥鏡堂以編修督學雲南歸過皖曾步行訪余安慶寓中以所注孝經賈正余後曾文正公令治兵入陝西陣亡余久訪其遺書不得今見之快然十六日至淮安晤孫海岑太守雲錦太守仲子名仲平余女子夫也諱太守在曾靖毅公軍中時所上論事書及需次金陵時論事稟牘事理通達宅心仁厚深敬服之留數日見其二子孝友溫恭男女雍穆余女亦知孝敬生一外甥殆所謂

和氣致祥者歟晤故人子廬江吳小軒提督長慶談竟夕時奉○朝命移軍山東籌海防二十六日登舟過寶應訪故人鮑花潭中丞源深未遇晤方子嚴觀察濬師贈余詩一首又讀其蕉窗隨筆十六冊多記載○本朝掌故又讀其所校刊傳鶉觚集晉傳元集也過高郵州遊露筋祠事雖未見史儼然固節烈貞女也命余妻往拜之過揚州謁史忠正公墓瞻仰其遺像遊平山堂竟日瞻仰歐陽公遺像山川平遠心曠神怡亦足樂也泊金山三日盡覽其勝瞻東坡蘇公遺像平山堂金山極亭臺之勝亂時皆燬前過其處五礫堆耳別十二年今至此已有盛年景象矣聞彭雪琴宮保駐節焦山不見公已十三年往訪之至焦山宮保前往吳淞口觀礮臺以俄夷生豐○朝命公兼轄海口防務余因泊舟山下登山眺覽次早將行宮保反不期而遇真奇緣也余與曾沅圃中丞別十七年與吳小軒軍門別十二年皆不期而過以慰離思倘所謂氣類相感者乎十月九日至金陵晤甘愚亭表兄紹盤訪舊友江甯汪梅村先生士鐸全椒薛慰農太守時雨涇洪琴西觀察汝奎武昌張廉卿中翰裕釗石埭陳虎臣明經艾甘泉劉恭甫明經壽曾旻縣朱仲武茂才孔彰霍山吳畏齋應焯竹如先生仲子也梅村狷介博洽爲江蘇宿學中第一人年將八十貧甚余欲贈以金不受贈以覆亦不受乃與洪琴西議助資爲刊其書虎臣恬靜寡欲不求仕進而孝友至性不減古人慰農有政事才守杭州多惠政以與大府不合告歸時年甫四十餘耳放浪山水辭章之中主講惜陰書院廉卿工古文辭宗法甚正恭甫余故友伯山子也能世守考據之學仲武孤苦自立工辭章其父駿聲精小學仲武能世其業賢子孫也畏齋謹身安貧能守竹如先生之教愚亭宰興化江甯崇明三縣皆有循名因崇民假報命案詐財不遂誣訴於上制府沈文肅公不察其誣遽入彈章後審其人實虛誣坐以罪而愚亭已先黜沈公不復爲奏白矣十日爲余生辰飲於愚亭家十一日過曾文正公祠前因思是日公生日也將入謁而不獲慰農使僕導之得拜謁焉久欲謁公祠在天津因

其祠中寓行醫夷人不願往今過金陵得見公祠又適值公生日亦一奇也十二日遊愚園明徐氏西園舊址亭臺池沼花木之勝甲於一府十三日遊故朝天宮舊址今為府儒學與劉恭甫謁顧亭林先生祠遊莫愁湖樓上供曾文正公與明徐中山王像中山王坐樓前文正公立樓後面對湖山披長衫不冠帶鬚眉神氣儼如生前惟比在直隸時容貌稍瘦此蓋復任江督時所摹吳竹莊方伯刻公一像於江西亦長衫不冠帶極肖蓋公未過五十時所摹也余此行多得古賢像在山東境見僧忠王像今又見文正像非大幸乎十四日愚亭登舟送余至大勝關竟夜談先是初九日亦來舟談一夕往年與愚亭好遊覽山水凡桐城佳山水處皆有余二人迹相別十四年今復得尋昔日之樂然余年六十三已衰愚亭年七十而健如少壯豈非其為官時胸少愧怍罷官時自反無歎使然乎愚亭有二孫能讀書天或者以此報之乎舟中讀洪忠宣傳夷堅志蕉窗隨筆評閱張廉卿古文校改柏堂集十餘冊過采石阻風登太白樓余每過平山堂金焦采石皆阻風數日豈性好山水有神者特縱余之遊觀邪過蕪湖訪石埭楊文至故友仲乾明經子也仲乾名德享好講心性之學躬行實踐雖造次顛沛未嘗違六十外從吳竹如先生遊窮理益力著有尚志居集十餘冊余索歸舟中為刪節之擬編校為謀刊行余在棗強凡師友遺書皆節錄編為數十冊惟仲乾書未得其本今獲全讀亦大快也仲乾生平積德累仁見其子能守其家心尤慰焉舟中涉獵唐孫真人千金方洪氏集驗方王伯申經傳釋詞諸書十一月三日抵安慶省寓同行者余與妻及少子培蔭三人戚黨一人族黨一人同鄉里一人僕三人婢二人僕婦母女二人至寓見寡妹子婦諸孫十餘人皆無恙未幾一弟來言與寡姊俱無恙然皆老矣



入都日記

祥符周星譽著

咸豐六年丙辰正月十一日己巳晴三鼓登舟應明日辰也季旣同舟送余至蕭山丑刻過柯橋

十二日庚午陰黎明過錢清遣人招珊士下船巳刻至蕭山東門珊士先渡江

十三日辛未晴巳刻偕瀛臺雪甌嘯篋藍叔春颿季旣渡江江水沙約五六里乘牛車跋水登江船江面只三四里矣未刻抵杭

十四日壬申雨試甌招同諸子游西湖出湧金門下湖船初擬至孤山金沙港看梅雨益甚遂不果放船過平湖秋月小憩卽返

十五日癸酉晴甚暖卯刻解纜過長安壩至石門縣泊月大好偕雪甌珊士登岸坐石橋看月

十六日甲戌陰北風作寒晚抵嘉興西門

十七日乙亥陰巳刻解纜風極利暮抵吳江縣泊

十八日丙子晴辰刻抵蘇州泊胥門訪平太守夜與珊士秉燭對作家書不覺鄉思橫集夜不能寐五鼓猛雨忽作欹枕聽之彌益悽然

十九日丁丑雨移船泊閶門中水衝

二十日戊寅曉晴午後雪

二十一日己卯陰極寒解維出關過望亭兩岸列營一典史駐此盤詰申刻雪抵無錫縣北門泊聯句未成大雪終夜

二十二日庚辰陰微雪偕雪甌珊士買小舟往遊慧山山徑雪盈數尺九龍諸峰際天一白疏林遠塔荒寒中凍色如畫踏雪款下映山庵

二十三日辛巳陰大風微雪夜半風益猛寒甚

二十四日壬午晴風如昨河凍仍泊黃埠墩下阻風三日矣悶甚越中今日郡試嘯篁試老喬梓約日內下榻寓園季貺代予作東道主想春暉堂中開樽翦燭亦憶及九龍山下孤篷風雪中人否爲之黯然

二十五日癸未晴大風仍泊黃埠墩下枯坐悶甚拉珊士覓渡步行往慧山山風正顛岸雪初返石徑聲確殊不良於行可三里餘方達擬登山試第一泉而街肆泥濘益甚乃止同款上陝山庵

二十六日甲申晴風稍微自黃埠墩解纜舟行殊鈍申刻抵戚墅堰泊僅行六十里

二十七日乙酉晴辰刻抵常州拜金靜川司馬未刻自常州解纜至奔牛泊自望亭以北每鄉鎮必有團練局稽察行旅營兵鄉勇圍寨市肆類皆飽食以嬉可歎也自常州至奔牛見小舟可千餘艘皆極敞以席蔽之每舟男婦小兒六七人聽其語似揚鎮土音大約貧民避難漂泊者也此輩安戢之不能禁約之不可不溝壑卽盜賊耳可爲隱憂

二十八日丙戌晴暖過丹陽縣隔城見女牆上旗幟林立蓋因廬州賊南竄故增兵立營于此泊新豐

二十九日丁亥晴暖辰刻自月河口渡江過二道橋鈔關移設此處無屋廨惟數大舟扼隘口盤詰而已抵六開泊

三十日戊子晴過高郵州泊六安溝

二月初一日己丑晴四鼓卽解纜風極利迨曉行四十餘里矣晨起風轉舟頗遲申刻過寶應縣暮抵大

金河

屬山陽

泊去淮安七十里過高郵以北便無防堵此間居民皆恬然不知兵詢之土人云癸丑賊陷廣

陵縣中曾一議鄉團城守今則久撤矣淮安枕河帶湖爲南北衝要今粵逆虎踞其南捻匪蟻擾其北守土者正當練兵集餉連絡秦郵徐州爲掎角之勢古人所以重守淮蓋控制得地則守江守河皆勝算也

更高枕而臥兵釋甲以嬉雖有天險甯足恃乎

初二日庚寅晴已刻過淮安府未刻抵清江浦泊張家碼頭

初三日辛卯晴作家書

初四日壬辰晴大風借珊士寬輿赴王營河流如帶輿人皆褰裳而渡從來所未有也東北風極猛河中

飛沙蔽天颯喉眯目大為所窘未刻抵湯吉升行余僱車二輛每輛十二兩二錢

初五日癸巳晴風稍微已刻開車渡鹽河至魚溝饘亥刻抵重輿宿

初六日甲午晴黎明開車渡新河去年全黃東注故運河徙此連歲南漕俱由海運當事者遂亦緩於修

復河政不舉恐運道自此壞矣午刻至仰化集饘屬宿午後與珊士賞驢驢無鞍鐙中道仆於泥晚抵順

河集宿屬宿

初七日乙未陰午晴開車渡順河已刻至峒崕饘屬宿暮抵紅花埠宿南屬宿北車中讀史記

初八日丙申晴開車已刻至郟城縣十里舖饘酉刻抵李家莊宿屬山縣

初九日丁酉晴大風過沂水已刻至沂州府饘酉刻抵半城宿瑞安孝廉黃貞香體立漱蘭體勞昆季來

初十日戊戌陰大風霾早發已刻至青駝寺饘山路磽確無一半平地蔽帷蹠臥簸蕩不得少甯酉刻抵

梁莊宿

十一日己亥陰大風開車午刻至鞏家城饘車中望敖山奇石骨立頭不戴土殊雄岫可喜酉刻抵敖陽

宿

十二日庚子晴午後大風辰刻開車行三十里余車輻折未數里復因驟驚翻車已刻至翟家莊饘連日

山行車中不得看書又不得睡今日路稍平得假寐半時許申刻抵羊流店宿店屋爽塏起居甚適陸行

以來第一日也胃滿小瘥臆間終苦不暢蓋每飽食後卽登車曲體踈臥所致行旅無事不苦慨然慨然尋羊太傅祠頽圯盡矣只破屋三楹槩像須眉模糊不復可辨

十三日辛丑晴五鼓開車山路甚惡已刻抵崔家莊饘午後車行泰山下雲霧蒙翳山色隱約不可辨申刻抵泰安府西關宿

十四日壬寅晴黎明開車遍地皆亂石大者如斗小者如卵縱橫磊砢彌望皆是車行其間輪與石相鬪輒掀起數尺聲洛洛如怒雷顛頓震盪不堪其苦午抵壑臺饘午後行兩山夾縫中直陋如土衝塞帷周眺四面皆層峰疊嶂雲光石氣滌漾萬重平生五嶽未登其一僅在眞定一望恆山及今日一望泰山耳薄暮抵張夏宿與雪甌談至四鼓始睡

十五日癸卯陰黎明開車山路惡如昨日午刻至杜家廟饘午後出山路頓平臥車中甚適未刻忽雨薄暮益甚至偃城宿夜雨達旦今日始有土倡挾琵琶來店中

十六日甲辰雨至午後見日黎明開車過濟河縣午刻至禹城饘酉刻至平原縣二十里鋪宿

十七日乙巳晴黎明開車過平原縣午刻至黃河崖饘酉刻抵劉智廟宿黃氏昆季以近詩見示卣香年廿七漱蘭纔廿四才思俱清綺途中唱和成帙可謂極友于之樂者矣對之不禁憶我季旣

十八日丙午晴五更開車過景州午至漫河饘薄暮抵富莊驛宿

十九日丁未陰開車已刻抵臧家橋饘過河間府晚抵二十里鋪宿黃氏昆季自商家林分道往保定府二十日戊申陰三鼓開車黎明抵任邱縣饘午後開車去雄縣十里渡河河面可三里蓋去秋河決此間遂瀦爲湖十二連橋俱在水中趙北口舊有村市百餘家亦不復可識矣申刻至雄縣宿

二十一日己酉雪黎明開車已刻渡河至孔家馬頭饘酉刻抵曲溝宿大雪終夜極寒

二十二日庚戌微雪辰刻開車午刻至固安縣館午後渡渾河申刻抵榆堡宿

二十三日辛亥陰黎明開車已刻至黃村館午後道中皆積潦大者幾及里許車行甚艱自河間以北車路多泥濘而近京爲尤申刻入南西門至山會邑館卸車與雪甌珊士同室臥得季旣正月二十五日書抵都第一日便得家言慈侍康娛門庭清吉開緘一笑頓忘行役之勞書後述齋中清供讀之悅與季旣同坐鷗堂煮茗對梅花也出門四十日矣只今日得一展眉耳

二十四日壬子晴大風偕雪甌珊士看屋先至水月庵尋舊寓已爲人租去憶庚戌歲曾居此兩月隔牆望院中老槐婆娑如昔不覺戀戀有故人之思遂至南橫街圓通觀定屋三間每月房租京錢十千

三月十一日戊辰晴大風飯後偕敬士出遊由南下窪子揀幽野處任意所之塹柳黃深汀蒲碧短一望晴沙淺渚蛙聲閣閣大似江南水鄉風景先至龍泉寺看董宗伯梁學士程侍郎碑復過陶然亭花樹極盛向僧籬索茗看花小憩而出擬更遊龍樹院至則雙扉扃寂隔牆望迎春丁香藍子山杏諸花爛漫競開徙倚久之遠見城西隅一寺甚宏敞因共趨赴寺額爲永樂禪林庭中花樹尤夥一揚州老僧邀客小坐室中盆花燦列深紅香白目不給賞中白碧桃一株尤穠豔花皆大于杯真吳家餅樣也坐甫定老僧便侈述所交名公卿某某敬士遽拉予走出足力漸乏遂覓路返寓終日大風徒走七八里衣上積塵盈寸敬士謂予京華冠蓋如鷺作此冷淡生活者恐不復有第三入矣敬士去年考差極高而春秋兩試均不得放不免抑抑予則以七年老庶常浮湛人海尤乏官趣宜其閒冷之志相同也



北行日錄

山陽黃鈞宰著

道光三十年庚戌春將以○○廷試入都三月十日與安東張禹山阜甯水少泉清河王紫丞會於王營明日啟行車左右傾側輒與頭角相觸避之且愈甚車夫曰子讀易乎其道用隨柔子之體虛與委蛇左之右之勿卽勿離骨幹其中不患脂韋予笑曰是誠名言君子之徒也內方外圓利用如車命名思義說在老蘇有子之識何爲乎僕夫

啟行後一日自眾興集入宿遷境道旁有雲集茶亭門書聯帖云爲名忙爲利忙忙裏偷閒喫盃茶去勞心苦勞力苦苦中作樂呼壺酒來禹山曾於他處見之明日宿灘上邳州屬也月下聽歌與少泉說豐沛故事予作滿江紅一闕

十五日微雨清塵緩轡康莊殊覺怡神爽目已而風雷怒作衣溼如水又以見行路之難也李僕帕首步從雨行四十里將及陰平而霽與少泉同遊泗山之寶峰寺登高四望皓月當天遠岫煙橫花村犬靜非復午前苦況矣寺僧聞人語扶杖出窺年幾八十相與話桑麻談風俗經函爲燕雀所棲佛象與鋤犁並設蓋釋而農者也

孟子廟規模壯闊○○天語輝煌望後二日由滕入鄒過焉同人敬謁聖象歷代碑記不勝讀最古惟廡間漢碣數十字則滕邑顏逢甲得之臥虎山前大略以封田贍族勒石戒子孫者距今二千年矣世傳三氏皆有井獨孟廟無之康熙初雷起殿前地陷丈餘清水一泓宛然成井因名天震

揚州程南卿客汶上署曩遊袁浦舊交也十八日抵汶南卿乘輿挈榼而來清談徹夜且曰東省山水不似江浙靈秀然獨得雄壯深厚之氣自秦岱而外如鄒之嶧山世稱洞府玲瓏巖竇奇峭汶邑有山名蜀如芙蕖出水獨立波心此皆轍蹟所經亦嘗遊覽及之乎曰未也南卿曰去此一日程望之林木蔽虧榮

若雲錦者東平鳳山也又二日至高唐巖高百仞叩之清越有聲者則所稱鳴石山也予曰能爲我言泰山乎南卿笑曰是則難言矣泰山高四十里周迴十有八盤由南天門歷東西二峰屈曲登絕頂則古封禪處也峰之最高者曰日觀遊人借宿僧寮四更觀日出霞光海氣無不詫爲奇觀他若桃花峪水簾洞玉女池諸勝遊者非累旬不能周豈言之一夕所能盡哉海內大觀不必身至其地卽一談述間景行行止固已嚮往不置已

過東平州西北車行山徑間左右壁立十數丈過客絕少繁承有句云山開一綫纔通馬路轉千盤不見人頗能狀險隘之勢又云輪曉不解相思苦滿載離愁上玉京則戲爲歌者發也途過平原恩德諸州縣八月不得雨二麥盡萎居人以糠稗爲餐少泉所謂四山斜照雲都赤百里平沙草不青其荒寂可想萬山不多作詩一日過酒肆題句云茅店荒莊又餞春往來車馬踏輕塵世間名利濃於酒醉殺前人醉後人可謂慨乎言之

沿途題壁詩甚多而佳者絕少惟同城驛云東阿道上春風天楊花片片飛作綿行人盡日向村塢馬頭塵起如飛煙數家茅屋山前路牆頭舊有題詩處滿樹桃花不見人流鶯曬罷還飛去語亦猶人而丰神秀倩新店宮香女史云雪滿征鞍沙滿衣北風吹粟上冰肌侍兒莫道寒威苦猶勝空庭倚竹時腰貼二首之一云雞聲喔喔四更餘正是沈酣入夢初嬌女那經行役苦朦朧扶起上征車又甜水鋪律句云敝裘蕭瑟浣塵沙村酒微醺興更賒暗逗春愁隄畔柳怕搔客緒路旁花慣嘗辛苦翻無病已分飄零不憶家別恨離情消不得年年惆悵獨天涯署眞州午橋氏題

河間獻王在漢室諸王中最賢尊禮儒生搜羅經籍史以大雅不羣目之至今祠祀不替廿四日道過河間有劉雲茶者仿長吉體題詩任邱店壁云一燈慘綠如蠶儻銅龍凍折天不霜毒螭噴沫老蟾死空青



黯淡如元黃驟耳驕嘶喋汗血車輪拍拍飛仙蝶河間膜拜古獻王書城大廠金銀闕秦坑餘燼光熊熊  
一照萬古陰霾空更爲東溟呼燭龍九天豔耀扶桑紅途間遇雨作也客有題其後者云如何風雨關河  
客尙有閒情弔獻王劉作較之前數詩氣韻相勝多矣

論○京師形勢者皆以泰山東聳爲龍華山西峙爲虎是已然前人謂泰山之脈自函谷而來東盡於海  
而諸水又皆由西而東則山水順趨氣難凝聚惟恭讀○○○聖祖文集載泰山脈絡自○盛京長白山  
分支入海海中磯島數十皆其發露之處至山東登州之福山起陸西南行八百餘里穹窿盤屈結爲泰  
山巍然爲五嶽之首云如是則諸水順流秦脈逆峙與華山支絡相接中原形勢拱衛甚固而○京都宅  
中臨外適在右山左海之間信乎天地之奧區矣